



官板

書集傳纂疏

五

□ 12  
3288  
5





門 口 12  
號 3288  
卷 5

書卷第五

蔡氏集傳

後學新安陳櫟纂疏

召誥

左傳曰武王克商遷九鼎於洛邑史記載武王言我南望  
洛邑而後去則宅洛者武王之志周公成王成之召公實先經理  
之洛邑既成成王始政召公因周公之歸作書致告達之於王其  
書拳拳於歷年之久近反復乎夏商之廢興究其歸則以誠小民  
為祈天命之本以疾敬德為誠小民之本一篇之中屢致意焉古  
之大臣其為國家長遠慮蓋如此以召  
纂疏 陳氏大猷曰成王  
公之書因以召誥名篇今古文皆有  
諸侯祀清廟於洛故鐫京謂之宗周以為天下所宗也洛邑謂之  
成周又云東都以周道成於此也洛邑天下之至中鐫京天下之  
至險於洛定鼎以朝諸侯所以承天地冲和之氣宅土中以洽四  
海其示天下也公於鐫定都以壯基本所以據天下形勝之地處  
上游以制六合其慮天下也遠漢唐並建兩京其亦識形勢之所  
在而有得於成王周公之遺意歟○愚謂宅洛之事武王志之成  
王述之上告祖廟迭咨大臣一日而建千萬年宅中圖大之基謹  
重如此周公自洛歸鐫召公因作書誥王其忠愛尤在此蓋以宅  
中圖大固難保大定功尤難王之在豐召之相宅固見宅中圖大  
之難矣召公拳拳以敬德永命戒王敬不敬之異効凡七言之至

石澤介吉氏藏

昭和十六年三月五日  
石澤介吉氏贈



謂不敬德則必墜厥命其詞甚危見保大定功之尤難也序畧不言非矣○林氏曰豐在鄠縣東豐水鑄在長安西南昆明池所謂鑄池也鑄在豐東二十五里

惟二月既望越六日乙未王朝步自周則至于豐

相望謂之望既望十六日也乙未二十一日也周鑄京也去豐二十五里文武廟在焉成王至豐以宅洛之事告廟也

惟太保先周公相宅越若

來三月惟丙午肫越三日戊申太保朝至于洛卜宅

厥既得卜則經營

成王在豐使召公先周公行相視洛邑越若來古語辭言召公於豐速遷而來也肫孟康曰月出也三日明生之名戊申三月五日也卜宅者用龜卜宅都之地既得吉卜則經營規度其城郭宗廟郊社朝市之位

越三日庚戌太保乃以庶殷攻位于洛汭越五日甲寅位成

庶殷殷也位成者左祖右社前朝後市之位成也

葉氏曰攻位者闢荆棘平高下以定所經營之位也庶殷所已遷殷民也離民為役則友民不言可知○林氏曰盤庚遷亳太王遷岐衛文遷楚丘皆卜今君臣既定議至洛乃卜洪範所以先乃心士民而後卜

筮也太王聿來胥宇而後爰契我龜若翼日乙卯周公朝至于

洛則達觀于新邑營

周公至則徧觀新邑所經營之位

越三日丁巳用牲于郊牛二越翼

日戊午乃社于新邑牛一豕一

郊祭天地也故用二牛社祭用太牢禮也皆告

以營洛

纂䟽

丁巳十四日戊午十五日○孔氏曰郊以稷配故牛二唐孔氏曰記及公羊皆曰養牲必三帝牛不吉以為稷牛○呂氏曰

郊祭天社祭地○陳氏經曰郊不曰新邑郊在國外社在國內也○王氏曰先祭告郊社然後用工○陳氏大猷曰此蓋即洛邑新立之郊社以告作洛於天地不告廟者在豐已告也時洛邑宗廟未成○愚按詩序言郊祀天地詩傳非之謂合祭天地於圜丘古未有此瀆亂龐雜之禮則謂郊祭天地用二牛異於詩傳矣二孔說是兼泰誓傳言郊祭天社祭地與此自異

越七日甲子周公乃朝用書命庶殷侯甸南邦伯

書役書也春秋傳曰士彌牟營成周計文數揣高下度厚薄勿溝洫物土方議遠邇量事期計徒庸

慮林用書糗糧以令役於諸侯亦此意王氏曰邦伯者侯甸男服之邦伯也庶邦冢君咸在而獨命邦伯者公以書命邦伯而邦伯以公命命諸侯也

纂䟽

甲子二十一日也自王乙未至豐到此凡三十日



事赴功也殷之頑民若未易役使者然召公率以攻位而位成周公纂疏陳

用以書命而不作殷民之難化者猶且如此則其悅以使民可知也

大猷曰言庶殷則諸侯可知○愚謂觀此則殷民之遷在未作洛之前明矣讀

此篇當參看洛誥洛誥曰予惟乙卯朝至於洛師我卜河朔黎水云云此云乙

卯周公朝至於洛其日同但洛誥言是日再卜耳乙卯至甲子十日乙卯日卜

及觀新營丙辰不言事蓋丁巳戊午將行郊社大禮前一日養精神而無為也

已未至癸亥五日又不言事乃將用書丕作竭精神以有為也此五日中午必會

集臣庶如計丈數至調餼糧等役書一定然後甲子朝頒布之洛誥脫簡之在

康誥者曰惟三月哉生鬼周公初基至乃洪大誥治即是三月十六日己未戊

午祭社後一日也曰大誥治即用書命丕作也細考之昭合無間焉誰謂殘編

斷簡中不可考見聖

人經理之微密哉

**太保乃以庶邦冢君出取幣乃復入錫**

**周公曰拜手稽首旅王若公誥告庶殷越自乃御事**

呂氏曰洛邑事畢周公將歸宗周召公因陳戒成王乃取諸侯贄見幣物以與

周公且言其拜手稽首所以陳王及公之意蓋召公雖與周公言乃欲周公聯

諸侯之幣與召公之誥併達之王謂洛邑已定欲誥告殷民其根

本乃自爾御事不敢指言成王謂之御事猶今稱人為執事也

君諸侯會於洛者洛邑成而獻幣所以為禮且致慶也○愚謂作洛之急務在

化殷人而化殷之大本在於王身下文遂詳言之此召公納忠之大者幣特恭

敬之寓耳取幣獨言庶邦而不及庶殷者蓋用書命丕作無間於庶殷而取

幣旅王不及於庶殷歟篇末奉幣供王之幣即此出取之幣前後相照應

**嗚呼皇天上帝改厥元子茲大國殷之命惟王受命**

**無疆惟休亦無疆惟恤嗚呼曷其奈何弗敬**

託周公達之王也曷何也其語辭商受嗣天位為元子矣元子不可改而天改

之大國未易亡而天亡之皇天上帝其命之不可恃如此今王受命固有無窮

之美然亦有無窮之憂於是歎息言王曷其奈何弗敬乎蓋深言不可以弗敬

也又按此篇專主敬言敬則誠實無妄視聽言動一循乎理好惡用捨不違乎

天與天同德固能受天明命也人君保有天命其有要於此哉

伊尹亦言皇天無親克敬惟親敬則天與我一矣尚何疎之有

集解曰此數句者一篇之大指也下文至篇終反復推衍此數句意耳○真氏

曰詩云天位殷適使不挾四方亦改厥元子大國殷命之意○愚謂此元子字

當與後元子哉對觀元子天之元子即大君者吾父母宗子之意此元子謂殷

紂後元子謂成王天命靡常人君所以保天命惟敬耳殷王元子嘗受天命矣

天竟改其命而王受之固有無窮之美然今日之受安知不為他日之

改是亦無窮之憂也何可以不敬乎始末兩言嗚呼所以深警上心也

**遐終大邦殷之命茲因多先哲王在天越厥後王後**

**民茲服厥命厥終智藏瘝在夫知保抱攜持厥婦子**

**以哀籲天徂厥亡出執嗚呼天亦哀于四方民其眷**

此下皆告成王之辭

**纂疏**

朱子



命用懋王其疾敬德

後王後民指受也此章語多難解大意謂天既欲遠絕大邦殷之命矣而此殷先哲王其精爽

在天宜若可恃者而商紂受命卒致賢智者退藏病民者在位民困虐政保抱攜持其妻子哀號呼天往而逃亡出見拘執無地自容故天亦哀民而眷命用歸於勉德者天命不常如此今王其可不疾敬德乎

**纂疏**

孔氏曰殷先哲王精神在天不能救者以紂不行敬故○唐孔氏曰夫猶人也言人

人皆然○愚謂當如左氏故夫致死焉之夫殷祖宗之難憑藉如此言外之意謂成王今豈可盡恃太王王季文王也蓋言天命不可恃祖宗不可恃惟敬德庶可疑固天命而迓續祖德耳敬德而言疾最有力蓋人心操則存捨則亡必緊着精神汲汲用工則莊敬日強而能敬苟悠悠玩愒則安肆日偷而不能敬矣後又言肆惟王其疾敬德一篇綱領在敬字而敬字工夫又在疾字

相古先民有夏天迪從子保

面稽天若今時既墜厥命今相有殷天迪格保面稽

天若今時既墜厥命

從子保者從其子而保之謂禹傳之子也面鄉也視古先民有夏天固啓迪之又從其子而保

佑之禹亦面考天心敬順無違宜若可為後世憑藉者今時已墜厥命矣今視有殷天固啓迪之又使其格正夏命而保佑之湯亦面考天心敬順無違宜亦可為後世憑藉者今時已墜厥命矣

**纂疏**

林氏曰格與惟帝降格之格同降格而保佑之謂下臨之也○

愚謂從其子而保之即天與子則與子之意開萬世傳子之端自禹始故於夏言從子保於商只言格保蒙上文也兩面稽天若即對越在天之意此蓋謂天

與祖宗皆不可恃也

今冲子嗣則無遺壽考曰其稽我古人之德

矧曰其有能稽謀自天

稽考矧况也幼冲之主於老成之臣尤易踈遠故召公言今王以童子嗣位不可遺

棄老成言其能稽古人之德是固不可遺也况言其能稽謀自天是尤不可遺也稽古人之德則於事有所証稽謀自天則於理無所遺無遺壽考蓋君天下者之要務故召公特首言之

**纂疏**

愚謂老成知古又能知天所賴以稽古道天道幸有壽考者聞見之遠無所質稽考天意以定

不能誠于小民今休丕不敢後用顧畏于民瘁

雖幼冲乃天之元子哉謂其年雖小其任則大也其者期之辭也誠和居險也王其大能誠和小民為今之休美乎小民雖至微而至可畏王當不敢緩於敬德用顧畏於民

召公歎息言王

之居險可也

**纂疏**

愚謂和小民今休矣猶欲王汲汲於畏民居者民之居慮以畏之則福兮禍伏險孰大焉故莊

王來紹上帝自服于土中

旦曰其作大邑其自時配皇天懋祀于上下其自時

中又王厥有成命治民今休

洛邑天地之中故謂之土中王來洛邑繼天出治當自服行於土中



是時洛邑告成成王始政故召公以自服土中為言又舉周公嘗言作此大邑自是可以對越上天可以享荅神祇自是以宅中圖治成命者天之成命也成王而能紹上帝服土中則庶幾天有成命治民今即休美矣○王氏曰成王欲宅洛邑者以天事言則日東景朝多陽日西景夕多陰日南景短多暑日北景長多寒洛天地之中風雨之所會陰陽之所和也

**纂疏** 陳氏大猷曰君前以人事言則四方朝聘貢賦道理均焉故謂之土中

愧於鬼神自是而宅中又治使俯無愧於民王其有成命而治民今休可也周公所期如此之重王不可不思所以稱之○愚謂作洛之事召公任之而未嘗明言之至此方言服於土中而舉周公之言以見作洛所以配上帝奉祭祀成治功凝天命其重如此蓋下文將自進其敬德祈天之忠言所以先引周公期望之語以開其端也

**王先服殷御事比**

**介于我有周御事節性惟日其邁**

言治人當先服乎臣也王先服殷之御事以親近副

貳我周之御事使其漸染陶成相觀為善以節其驕淫之性則日進於善而不已矣

**王敬作所不可不敬德**

言化臣必謹乎身也所處所也猶所其無逸之所王能以敬為所則動靜語默出入起居無往而不居敬矣不可不敬德者甚言其德之不可不敬也

**纂疏**

王敬作所不可不敬德只是一句○孔氏曰召公既述周公言又陳已意以終其戒言當先治服商御事之臣使比近我周治事之臣敬為所

不可不敬之德○林氏曰周遷殷民於洛蓋與洛之民雜居其善惡之習不同非有以和一之不能相安以處故必有以服殷御事使親比介助周之御事然

後可蓋周御事習於教令無事服之以服殷御事為先也然服殷御事在節其性而已蓋人性無不善殷人特化紂之惡是以不義之習遂與性成而忘反耳有以節之使日進於善則與周人何異哉然欲節民性在王所化土當敬為其所不可不敬之德以率之非政刑所及也○陳氏大猷曰既以周臣率之使之相觀而善又以身率之使之下觀而化也殷臣化殷民亦視效之而化矣○愚按王敬作所不可不敬德朱子本孔氏作一句說蔡氏以所字為句作兩句說真氏乙記以蔡說為長然蔡說實自呂氏所其無逸之解發之殷人汙於舊染而其性流今欲節之使其性復亦惟化以敬德耳敬者一心之主宰性即心所具之理也敬則此心收斂於天理之中而性可節不敬則此心放縱於人欲之偽而性日流日其邁即上達反天理而日進乎高明之意也然王豈為化商而始勉於敬哉特自敬為我所不可不敬之德而已謂之不可不敬蓋敬者人心所當然而不可不然者非有所勉而然如飢食渴飲之常無所為而為者也能如是則敬盡於此

**我不可不監于有夏亦不可不監于有**

**殷我不敢知曰有夏服天命惟有歷年我不敢知曰不其延惟不敬厥德乃早墜厥命**

**受天命惟有歷年我不敢知曰不其延惟不敬厥德**

**乃早墜厥命**

夏商歷年長短所不敢知我所知者惟不敬厥德即墜其命也與上章相古先民之意相為出入但上章主言天眷



不足恃此則直言不

**纂疏**

林氏曰古人於天命不以為必有不以為必無

敬德則歷年不敬德

則墜命則無可疑者 **今王嗣受厥命我亦惟茲二國命嗣**

若功王乃初服

今王繼受天命我謂亦惟此夏商之命當嗣其有功者

化之

**纂疏** 愚謂王乃初服者善始可以占終法二國之敬德而歷年尤當謹

始乎 於初服也此句呂恭以屬上章孔朱真陳以冠下章使與初生初

服宅新邑為一套亦通但此句實結上生 **嗚呼若生子罔不在厥**

**初生自貽哲命今天其命哲命吉凶命歷年知今我**

**初服**

歎息言王之初服若生子無不在於初生習為善則善矣自貽其哲命

為政之道亦猶是也今天其命王以哲乎命以吉凶乎命以歷年乎皆

不可知所可知者今我初服如何爾初服 **宅新邑肆惟王其疾敬**

**德王其德之用祈天永命**

宅新邑所謂初服也王其疾敬德容可

**纂疏**

集解王之初服不可不謹其習猶子之初生不可不慎初所教蓋習於

上則智習於下則愚矣故今天命正在初服之時敬德則哲則吉則歷

知今我初服至祈天永命為一節○呂氏曰哲命者人心所有之明哲非自外  
來人自初生而保養乃可以全其善也○林氏曰天以正性命人初無智愚之  
別所以有智愚於己取之而已下愚為自暴自棄則上智豈非自貽乎○葉氏  
曰哲命以哲為天所命也○真氏曰天命至公不可以求而得曰祈者蓋一於  
用德乃不祈之祈也○愚按呂林皆以哲命為性命之命然哲命命哲不應遽  
有性命眷命之分當以葉氏之說為正明哲之性與生俱生初生之時習於善  
則明可作哲習於惡則靡哲而愚哲則為天所命愚則天不命之是自貽哲命  
如所謂自求多福此所謂罔不在厥初生時自貽哲命者也王之初服亦猶是  
耳此一節發明王乃初服之意蓋今日作新邑而自服土中乃所謂初服是又  
中天下定四海之一初也天之命吉命凶判於此王之能敬德祈永命與不能  
亦判於此召公所以欲王乘此一初之機而疾敬德也疾敬德則能用德矣疾  
云者欲乘此機而速勉之自今罔後之謂也疾敬德者勿失此機於今日之初  
而能用德以祈天者可永命於千萬年之久今此一初豈可又以悠悠失之  
哉肆惟王其疾敬德蓋申上文王其疾敬德之語而致重複懇切之意云 **其**

**惟王勿以小民淫用非彝亦敢殄戮用乂民若有功**

刑者德之反疾於敬德則當緩於用刑勿以小民過用非法之故亦敢於殄戮

用治之也惟順導民則可有功民猶水也水泛濫橫流失其性矣然壅而遏之

則害愈甚惟順而 **其惟王位在德元小民乃惟刑用于天**

**下越王顯**

元首也居天下之上必有首天下之德王位在德

元則小民皆儀刑用德於下於王之德益以顯矣

**纂疏** 陳



大猷曰德元猶乾元坤元之始生萬物者也一說元好生之仁德也○愚按至此則淫用非彝之民化為刑用德元之民正所謂順導之而有功者王奚以尚刑不尚德為哉嗣若功若上下勤恤其曰我受天命丕若有

夏歷年式勿替有殷歷年欲王以小民受天永命其亦

期之辭也君臣勤勞期曰我受天命大如有夏歷年用勿替有殷歷年欲兼夏殷歷年之永也召公又繼以欲王以小民受天永命蓋以小民者勤恤之實受天永命者歷年之實也蘇氏曰君臣一心以勤恤民庶幾王受命歷年如夏商且以民心為天命也

**纂疏**

以小民如以某師之以○林氏曰王

能敬德於上而小民儀刑於下則天永命之所謂用小民而受永命也○呂氏曰召公奉養言小民者國之根本全在小民其興其亡不在大族不在諸侯止在小民之身○陳氏曰小民人所易忽澤及小民則無不及矣堯之不虐無告文王之施仁先四者是也○愚謂勤恤即無疆惟恤之恤上下勤勞以軫無疆之恤惟期於兼二代之歷年非他也有以也惟欲王以小民受永命耳三節三言小民始戒王以非彝殄戮之繼欲以元德儀刑之末欲以之而受永命以之者何惟尚德不尚刑知其生雖至微而關於天命者至大至久也○真氏曰前言王其德之用祈天永命此言欲王以小民受天永命永命之道無他惟用德與愛小民而已德及小民方為用德之至也又曰一篇之中言敬者凡七八曰曷其奈何弗敬曰王敬作所不可不敬德曰王其疾敬德兩言不敬厥德早墜厥命曰肆惟王其疾敬德言之諄望之切老臣事少主倦倦之心也異時成王享百年之壽而周卜世卜年卒過其曆然後知召公之言真人主之藥石國家之

著日龜也哉拜手稽首曰予小臣敢以王之讐民百君子越

友民保受王威命明德王未有成命王亦顯我非敢

勤惟恭奉幣用供王能祈天永命讐民殷之頑民與三監叛者百君子殷之御事庶士

也友民周之友順民也保者保而不失受者受而無拒威命明德者德威德明也末終也召公於篇終致敬言予小臣敢以殷周臣民保受王威命明德王當終有天之成命以顯於後世我非敢以此為勤惟恭奉幣帛用供王能祈天永命而已蓋奉幣之禮臣職之所當恭而祈天之實則在王之所自盡也又按恭奉幣意即上文取幣以錫周公而旅王者蓋當

**纂疏**

薛氏曰先讐民後友

時成王將舉新邑之祀故召公奉以助祭云先也與前言先服殷御事同意○陳氏大猷曰篇終復總始末之要以告王敢以讐民等保受威命明德者因庶殷侯甸和會作洛而言敢以者自任之辭如命侯甸殷庶即王之威命來紹自服即王之明德先行相宅以後皆保受也王未有成命與上王厥有成命相應王亦顯與上越王顯相應我非敢自居其勤慮王以人心已從天命已定而自足也惟恭奉前所取以旅王之幣待王能祈天永命將以致慶而已期望不已之意可謂婉而篤矣記曰頌而無諂諫而無驕召誥以之○愚謂讐民百君子友民即指庶殷侯甸和會作洛之人也所謂能祈天永命不過上文敬德愛小民之事敬德愛小民即祈天永命之能也上文已盡之故於篇終特以能字該之



洛誥

洛邑既定周公遣使告卜史氏錄之以為洛誥又并記其君臣答問及成王命周公留治洛之事今古文皆有○按周公拜手稽首以下周公授使者告卜之辭也王拜手稽首以下成王授使者復公之辭也王肇稱殷禮以下周公教成王宅洛之事也公明保予冲子以下成王命公留後治洛之事也王命予來以下周公許成王留洛君臣各盡其責難之辭也俘來以下成王錫命成殷命寧之事也成辰以下史又記其祭祀冊誥等事及周公居洛歲月又近以附之以見周公作洛之始終而成王舉祀發政之後即歸於

**纂疏** 因讀尚書曰其間錯誤解不得處甚多周而未嘗都洛也昔伯恭解書因問之曰尚書還有解不通處答曰無有因舉洛誥問之云據成王只使周公往營洛故俘來獻圖及卜成王未嘗一日居洛後面如何却與周公有許多答對又云王在新邑此如何解伯恭無以答後得渠書云誠有解不得處○洛誥之文有不可曉者其後乃言王在新邑而其前已屢有答問之詞矣○三盤五誥之類實是難曉若要添減字硬說將去儘得然即是穿鑿恐終無益耳○葉氏曰此篇當與召誥參看○王氏安石曰此誥有不可知者當缺之而釋其可知者○愚按此篇大可疑者惟有公告王宅洛行祀出命之辭而不載王至洛之事與其日月觀十二月在洛祭告命周公留治洛之事尚謹書之則自三月後至十二月前此數月中至洛之大事其書之也必矣觀此篇首章九句脫簡在康誥之首則王親至洛行祀出命等事其脫簡又可想矣且孺子其朋及汝惟冲子惟終等處聲牙難

周公拜手稽首曰朕復子明辟

此下周公授使者告卜之辭也拜手稽首者史記周公遣使之

通上下不續又王曰公功非迪篤之下無周公答辭而即繼以王曰豈非此等處有脫簡錯簡耶細消詳之可見

禮也復如逆復之復成王命周公往營成周周公得卜復命於王也謂成王為子者親之也謂成王為明辟者尊之也周公相成王尊則君親則兄之子也明辟者明君之謂先儒謂成王幼周公代王為辟至是反政成王故曰復子明辟夫有失然後有復武王崩成王立未嘗一日不居君位何復之有哉蔡仲之命言周公任冢宰正百工則周公以冢宰總百工而已豈不彰彰明甚矣乎王莽居攝幾傾漢鼎皆儒者有以啓之是不可以不辨○蘇氏曰此上有脫簡在康誥自惟三月哉生鬼至

**纂疏** 孔氏曰周公言我復還明君之政於子子成王洪大誥治四十八字

成周公得卜復命於王曰子親之也曰明辟尊之也先儒以周公代王為辟至是反政以書攷之周公任冢宰正百工而未嘗代王為辟何復之有按關孔註始於荆公蔡傳采之○程子曰猶言告嗣天子王矣○葉氏曰復如孟子有復於王書說復于王之復明堂位云周公踐天子位漢儒之言云爾不足信也○愚按王莽廢漢孺子嬰為定安公執其手流涕曰昔周公攝位終得復于明辟今予獨迫皇天威命不得如意蓋因孔氏釋經之誤莽遂借此以文其姦云右此章止當移元洛誥

脫簡冠于首而讀之

大相東土其基作民明辟

凡有造基之而後成成之而後定基命所以成始也定命所以成終也言成王幼

王如弗敢及天基命定命予乃膺保



沖退託如不敢及知天之基命定命予乃繼太保而往大相洛邑其庶幾為王始作民明辟之地也洛邑在鎬京東故曰東土纂疏公不欲幼不能故言王若不敢及天之初命定命○王氏炎曰承天命以作新邑是謂基命都邑既成久安長治是謂定命

至于洛師我卜河朔黎水我乃卜澗水東瀍水西惟

洛食我又卜瀍水東亦惟洛食佯來以圖及獻卜乙卯

即召誥之乙卯也洛師猶言京師也河朔黎水河北黎水交流之內也澗水東瀍水西王城也朝會之地瀍水東下都也處商民之地王城在澗瀍之間下都在瀍水之外其地皆近洛水故兩云惟洛食也食者史先定墨而灼龜之先正食其墨也佯使也圖洛之地圖也獻卜獻其卜之兆辭也  
纂疏張氏曰王者以民為重故曰師○袁氏曰黎水言河朔則知澗瀍皆河南○陳氏經曰先言惟洛食即今河南後言惟洛食即今洛陽言公於洛卜此二處也召誥曰太保朝至於洛卜宅則卜乃召公也今周公曰我卜者二公同心同謀召公之卜即周公之卜也○蘇氏曰黎水今黎陽也營洛以處殷民民重遷以河朔為近便卜不吉然後卜洛也○呂氏曰意在河朔近地者商民之心意在洛邑地中者周公之心列二說以聽於天而已先卜黎者先人後己也黎不吉卜洛而吉公之心即天之心也無間故無違也○史氏漸曰澗東瀍西即洛之中澗水東即洛之偏洛邑居天下之中伊洛瀍澗周流其間天子南向則澗在洛之右瀍在洛之左公於澗瀍之中卜而告吉遂營王城以建王宮定郊社宗廟是為郊鄙今河南是也又循之左越瀍水之東卜又告吉遂營下都名曰成周又

曰東郊以居殷民今洛陽是也二城相距蓋十有八里 王拜手稽首曰公不敢不敬天

之休來相宅其作周匹休公既定宅佯來來視予卜

休恒吉我二人共貞公其以予萬億年敬天之休拜

手稽首誨言 此王授使者復公之辭也王拜手稽首者成王尊異周公而重其禮也匹配也公不敢不敬天之休命來相宅為周

匹休之地言卜洛以配周命於無窮也視示也示我以上之休美而常吉者也二人成王周公也貞猶當也十萬曰億言周公宅洛規模宏遠以我萬億年敬天休命故又拜手稽首  
纂疏呂氏曰營洛實配宗周匹者對宗周之辭我與以謝周公告卜之誨言  
甚重而望之者甚長也○王氏十朋曰詩作豐伊匹與匹休同意○夏氏曰貞如厥賦貞相當也王欲與公共當此吉卜○王氏曰凡卜有貞其吉凶者太卜言國大遷大師則貞龜○愚按視與示同古字通用漢書凡示字例作視十萬曰億秦誓又云百萬曰億不同何也詩禾三百億鄭注十萬曰億毛云萬萬曰億孔疏今九章算術皆以萬萬為億鄭以古數言之韋昭註禁語曰十萬曰億古數也秦始以萬萬為億百萬為億未見所本  
周公曰王肇稱殷禮祀于新邑成秩無文 此下周公告成王宅洛之事也殷盛也與五年再殷祭之殷同秩序也無文祀典不載也言王始舉盛禮祀於洛邑皆序其所當祭者雖祀典不載而義當祀者亦序而祭之也○呂氏曰定都之初肇舉盛禮大饗羣祀雖祀



典不載者成秩序而祭之有告焉有報焉有所焉始建新都昭格上下告成事也兩賜時若大役以成報神賜也自今以始永奠中土祈鴻休也後世不知祭祀之義鬼神之德觀周公首以祀於新邑為言若闕於事情者抑不知人王臨鎮新都之始齊敬一心對越天地達此精明之德放諸四海無所不準而助祭諸侯下逮胞翟之賤亦皆有孚顛若收其效而合其維

**纂疏**

自此以下漸蓋格君心萃天下之道莫要於此宜周公以為首務也

既祭復歸鎬因留公居守而公有此言皆不可考○董氏曰易曰殷薦之上帝禮有殷祭殷奠皆取殷盛之義○愚謂王氏云此殷禮疑即篇末十二月戊辰之祭史述其語於前而記其事於後也竊意十二月之祭不過以周公留洛之事就冬烝以告文武廟耳此曰殷禮曰秩無文必作新邑後就新邑舉非常大祭祀豈十二月特牛之祀足以當之三月後至十一月必嘗親至洛行大祀禮受大朝賀發大號令今脫去矣自此下至無遠用矣乃洛邑既成公自洛還鎬告王以宅洛所當行之事而請王以行及自陳欲退老之辭也繼此云云述往復之辭而有錯誤之簡者也証之召誥公定宅後嘗還鎬京觀召公取諸侯之幣以錫公由公以達王則可見矣孺子其朋以下必有訛誤脫簡漏却王祀新邑等必在此處無疑也況梓材庶邦享集丕享等語其為敬識百辟享之上下文脫簡在彼尤為顯然乎

**予齊百工倅**

從王于周子惟曰庶有事

周公言予整齊百官使從成王于周謂將適洛時也子惟謂之曰庶幾其

有所事乎公但微示其意以待成王自教詔之也

**纂疏**

愚謂有事即祀事也國之大事在祀與戎古人於祭祀皆曰有事周公言我整

齊共營洛之百官使從王于宗周我惟謂曰王庶幾將行祀事於新邑乎微示此意於百官待王自教詔之

今王即命日記

功宗以功作元祀惟命曰汝受命篤弼

功宗功之尊顯者祭法曰聖王之制

祭祀也法施於民則祀之以死勤事則祀之以勞定國則祀之能禦大災則祀之能捍大患則祀之蓋功臣皆祭於大烝而勳勞之最尊顯者則為之冠故謂之元祀周公教成王即命日記功之尊顯者以功作元祀矣又惟命之曰汝功臣受此褒賞之命當益厚輔王室蓋作元祀既以慰答功臣而又勉其左右王室益圖久大之業也

**丕視功載乃汝其悉自教工**

丕大視示也功載者記功之載籍也大視功載而無不公則百工效之亦皆公也大視功載而或出於私則百工效之亦皆私也其公其私悉自汝教之所謂乃汝其悉自教工也上章告以褒賞功臣故戒其大視功

**纂疏**

王氏日記功若紀於太常藏在盟府之類○呂氏曰洛邑既成周業既定論創業元勳不可後也功臣之冠天下觀瞻鎮服羣下實係此舉論功莫先於宗言宗則凡功臣可得而推矣報功莫重於祀言祀則凡慶賞可得而推矣○吳氏曰已死者祀之生者載以旌之○愚謂公因告王今當即出命曰新邑之祀將前所記錄創業功臣之宗勳勞最顯者以其功列之大祀使與享矣又當專命羣臣曰汝之受命而能厚輔王室者亦將大視其功而紀載於冊書以功作元祀所以報功臣於既往丕示功載所以勵功臣於方來載之今日又將祀之後日也公又謂王言上即命惟命二說乃汝其悉自教詔於百工其機雖自公發之其教當自王出之也

**孺子其朋孺子其朋其往無**



若火始燄燄厥攸灼敘弗其絕

孺子稚子也朋比也上文百工之視倣如此則論功行賞雖孺子

其可少狗比黨之私乎孺子其少狗比黨之私則自是而往有若火然始雖燄燄尚微而其灼燄將次第延熱不可得而撲滅矣言論功行賞徇私之害其初甚微其終至於不可遏絕所以嚴其辭而禁之於未然也

纂疏林氏曰如漢之朋黨始於甘陵南北郡唐之朋黨始於牛李其終縉紳稔禍海內塗炭是也○愚謂自此以下必有脫誤如二孺子句及灼敘等語皆不可曉與上文本不相貫所當缺疑

厥若彛及撫事如

予惟以在周工往新邑

其順常道及撫國事常如我為政之時惟用見在周官勿參以私人往新邑使百工知上意嚮各就有僚

成裕汝永有辭

明白奮揚而赴功博大厚博大以裕俗則王之休聞亦永有辭於後世矣

纂疏呂氏曰漢文近於博大成裕而無所謂明作有功績而又博厚廣大以成寬裕是立精明之治功而存渾厚之治體也惟以在周工往新邑乃是欲王以從王於宗周之百工往之新邑也此八字却與前予齊百工倅從王於周相照應

公曰已汝惟冲子惟終

當惟其終猶伊尹言慎厥終

汝其敬識百辟享亦識其有不享享多儀儀不及物

惟曰不享惟不役志于享凡民惟曰不享惟事其爽

此御諸侯之道也百辟諸侯也享朝享也儀禮物幣也諸侯享上有誠有偽惟人君克敬者能識之識其誠於享者亦識其不誠於享者不在幣而

在於禮幣有餘而禮不足亦所謂不享也諸侯惟不用志於享則國人之亦皆謂上不必享矣舉國無享上之誠則政事安得不至於差爽僭侮陳王度而為叛亂哉人君可不以敬存

纂疏幣有餘而禮不足者往往有輕上之心心辨之於早而察之於微乎以爲可以幣交曰吾幣足矣何以禮為如是者猶不享也○蘇氏曰小人賄以悅人必簡於禮公戒王責諸侯以禮不以幣恐其役志乎物而不役志乎禮則諸侯慢而王室輕矣春秋傳曰晉趙文子為政薄諸侯之幣而重其禮魯穆叔曰自今以往兵其少弭矣列國之御輕幣重禮猶足以服人心况天子乎唐襄君相皆可以賄取方鎮皆貢羨餘行苞苴而天子失政以至於亡周公之戒至矣○愚謂此因將往新

邑受諸侯朝享而言亦因召公取諸侯之幣以旅王而言也

乃惟孺子

頌朕不暇聽朕敘汝于棊民彛汝乃是不獲乃時惟

不永哉篤敘乃正父罔不若予不敢廢乃命汝往敬

哉茲予其明農哉彼裕我民無遠用戾

此敘養萬民之道也頌朕不暇未詳或曰成王當頒布我汲汲不暇者聽我敘汝所以輔民常性之道汝於是而不勉焉則民彛泯亂而非所以長久之道矣正父武王也猶今稱先正云者篤者



篤學而不忘敘者先後之不素言篤敘武王之道無不如我則入不敢廢汝之命矣呂氏曰武王沒周公如武王故天下不廢周公之命周公去成王如周公則天下不廢成王之命戾至也王往洛邑其敬之哉我其退休田野惟明農事蓋公有歸老之志矣彼謂洛邑也王於洛邑和裕其民則民將無遠而至焉

**纂疏** 陳氏經曰汝當頌我前日未暇為之事一行之○或曰武王撥亂餘當缺之味此二句可見公時在鎬欲王往新邑而已將退老也此章之下當必有公從王至新邑舉祀發命之事而今缺矣 **王若曰公**

**明保予冲子公稱丕顯德以予小子揚文武烈奉答**

**天命和恒四方民居師** 此下成王答周公及留公也大抵與上章參錯相應明顯明之也保保祐之也稱舉

也和者使不乖也恒者使可久也居師者宅其衆也言周公明保成王舉大明德使其上之不忝於文武仰不愧天俯不忤人也 **纂疏** 謂

此王既至洛舉祀後與公言將留公治洛先敘述公之功德以慰藉之也 **惇宗將禮稱秩元祀成秩**

**無文** 宗功宗之宗也下文宗禮同將大也 **纂疏** 孔氏曰厚尊大禮舉秩大祀蘇氏曰言此已行之事之辭即答公所謂王肇稱殷禮祀於新邑成秩無文也 **惟公德明光于上下勤施于**

**四方旁作穆穆迓衡不迷文武勤教予冲子夙夜毖**

**祀** 旁無方所也因上下四方為言穆穆和敬也迓迎也言周公之德昭著於上下勤施於四方旁作穆穆以迎治平不迷失文武所勤之教於天下公之德教加於時者如此予冲子夫何為哉惟早夜以謹祭祀而已蓋成王知周公有退休之志故示其所以留之意也 **纂疏** 陳氏大猷

太平方且和敬以迓之而已治猶未治也使以為既平則無疊疊方進之意盈而不可久矣○唐孔氏曰衛獻公言政由甯氏祭則寡人意亦略似言祭則我小子迓太平明教化皆委重於公也○愚謂此王推美歸重於公猶欲其益因德業之盛而加自強不息之誠我小子但主祀而已此已示留公之意矣

**王曰公功棐迪篤罔不若時** 言周公之功所以輔我啓我者厚矣常常如是未可以言去也 **王**

**曰公予小子其退即辟于周命公後** 此下成王留周公治洛也成王言我退即居於

周命公留後治洛蓋洛邑之作周公本欲成王遷都以宅天下之中而成王之意則未欲捨鎬京而廢祖宗之舊故於洛邑舉祀發政之後即欲歸居於周而留周公治洛謂之後者先成王之辭猶後世留守留後之義先儒謂封伯禽以為魯後者非是致之費誓東郊不關乃在周公東征之時則伯禽就國蓋已久矣下文惟告周公其後其字之義 **纂疏** 上文王曰兩段周公無答辭疑有益可見其為周公不為伯禽也 而命公留於洛猶唐節度留後之意○史丞相說書亦有好處如命公後舊說云命伯禽為周公後史云成王既歸命周公在後看公定予往已一言便見得周公在後之意○真氏曰按史記魯世家伯禽即位之後管蔡等反准夷徐戎亦並興於是伯禽帥師伐之於彤遂平徐戎據此則蔡說當矣○愚謂成王自



言其退即辟於周味退之一辭則王時進在洛邑可知是時已行祀發政將還  
鎬京據身在洛邑言故以還歸宗周為退退固王之謙詞亦述往返語勢之當  
然耳先儒於此皆忽之故不敢  
質言此章為王至洛後之辭也

**四方迪亂未定于宗禮亦未克**

**救公功** 宗禮即功宗之禮也亂治也四方開治公之功也未定功宗之禮  
故未能救公功也救功者安定其功之謂即下文命寧寧者也

**纂疏** 迪順也四方雖已順治猶未定于  
尊公之禮未有以撫安公之功 **迪將其後監我士師工**

**誕保文武受民亂為四輔** 將大也周公居洛啓大其後使我士師  
工有所監視大保文武所受於天之民

而治為宗周之四輔也漢三輔蓋本諸此今按先言啓  
大其後而繼以亂為四輔則命周公留後於洛明矣 **纂疏** 周公在後監  
師也工也四輔猶四鄰○愚謂王制曰設四輔及三公四輔左輔右弼前疑後  
丞也引王制之四輔解此四輔亦與朱子四鄰之說合王以治為四輔之大臣  
望公下文公以治為四方之新君

望王君臣交相期望意相照應 **王曰公定予往已公功肅將祗**

**歡公無困哉我惟無斃其康事公勿替刑四方其世**

**享** 定爾雅曰止也成王欲周公止洛而自歸往宗周言周公之功人皆肅而  
將之欽而悅之宜鎮撫洛邑以慰憚人心毋求去以困我也我惟無厭其  
安民之事公勿替所以監我士師工者四方得以世世享公之

德也吳氏曰前漢書兩引公無困哉皆以哉作我當以我為正 **纂疏** 此王與  
公決而

歸之言也公定居洛予往歸周已公無困哉言公無以事自困猶漢所謂閱勞  
公以官職之事也○張氏曰公之功如此猶肅敬以自將謂不驕矜於人皆敬之  
悅之○真氏曰公功如此而猶以肅自將以敬自樂可見公之盛德○王氏炎  
曰無替其所以示儀刑於我者○愚按此章之上必有公答王之辭蓋不許王  
留後之請也所以王言公止我往歸周矣公無困我是以不許留為困之其辭  
危勿替刑以下其望遠又上章言予冲子夙夜恭祀成王全倚重於公而已僅  
主祭宜公未許留至此曰我惟無倦於康安之事是王能  
以安天下自任而不全倚於公宜公下章幡然許留也 **周公拜手稽**

**首曰王命予來承保乃文祖受命民越乃光烈考武**

**王弘朕恭** 此下周公許成王留等事也來者求洛邑也承保乃文祖受命  
民及光烈考武王者答誕保文武受民之言也責難於君謂之

恭弘朕恭者大  
其責難之義也 **纂疏** 陳氏曰弘大  
我事君之恭 **孺子來相宅其大惇典殷**

**獻民亂為四方新辟作周恭先曰其自時中又萬邦**

**咸休惟王有成績** 典章也殷獻民殷之賢者也言當大厚其典章  
及殷之獻民蓋文獻者為治之大要也亂治也言

成王於新邑致治為四方新主也作周恭先者人君恭以接下以恭而偁後王  
也公又言其自是宅中圖治萬邦咸底休美則王其有成績矣此周公以治洛  
之效望之 **纂疏** 愚按孺子來相宅乃公述王之此行也作周恭先為周家恭  
成王也

敬之王之先以恭而率先夫後之為王者也曰者公期望於



王之辭其自時中又予旦以多子越御事篤前人成烈艾其

其即將然之辭也師作周乎先考朕昭子刑乃單文祖德

多子者眾卿大夫也唐孔氏曰子者

有德之稱大夫皆稱子師眾也周公言我以眾卿大夫及治事之臣篤厚文武成功以答天下之眾也孚信也作周乎先者入臣信以事上以信而倡後人也考成也昭子猶所謂明辟也親之故曰子刑儀刑也單彈也言成我明子儀刑而殫盡文王之德蓋周公與羣臣篤前人成烈者所以成成王之刑乃殫文祖德也此周公以治

**纂疏**

呂氏曰考察我告子之言乃盡本於文祖之德蓋文德之精微皆在此自加考察可也○愚謂作周

孚先為周家孚信之臣之先以信而率先夫後之為臣者也亂為四方新辟當與前亂為四輔對觀作周乎先當與前作周恭先對觀蓋公與王交相期望各盡責任之辭考朕昭子刑即答前公勿替刑之言此云昭示子之儀刑則

勿替刑其為勿替示王以儀刑明矣○陳氏大猷曰此處上下疑有缺文

來必殷乃命寧予以秬鬯二旨曰明禋拜手稽首

**休享**此謹必殷民而命寧周公也秬黑黍也一稔二米和氣所生鬯鬱金香草也旨中尊也明潔禋敬也以事神之禮事公也蘇氏曰以黑黍為酒合以鬱鬯所以裸也宗廟之禮莫盛於裸王使人來戒救庶殷且以秬鬯二旨綏寧周公曰明禋曰休享者何也事周公如事神明也古者有大賓客以享禮禮之酒清人渴而不飲肉乾人飢而不食也故享有體薦豈非敬之至者則其禮如祭也歟

**纂疏**

愚謂自此至萬年其永觀朕子懷德

乃主歸鎬後使人來勞周公因祭文武而全載其祝辭也寧如歸寧父母之寧曰明禋拜手稽首休享者述王命使之辭曰此明潔以禋祀之酒今拜稽而致休美以享公焉敬之至者其禮如祭傳曰享有體薦一証也記曰君子敬則用祭器又一証也碎分不貫必通全章說之不敢越宿如不宿肉君言不宿於家蔡氏謂與三宿之宿同宿乃進爵也惠篤敘至朕子懷德此祝辭全文不必分為二節祝辭之意云願惠順篤厚而有次敘身其康彊無有遇自己之疾子孫逢吉萬年厭飽文武之德焉此公自致禱祝之辭也殷人亦引長壽考王使殷人乃皆承順其教條次序將萬年永觀法朕子而懷其德焉朕子指成王曰王尊之曰朕子親之此公為王禱祝之辭也雖曰祝辭然禱祝之中有規勉之意末二句歸重於王然非徒徼福於先王而已也

宿則禋于文王武王

宿與顧命三宿之宿同禋祭名周公不敢受此禮而祭於文武也

惠篤敘

無有違自疾萬年厭于乃德殷乃引考

此祭之祝辭周公為成王禱也惠順

也篤敘與篤敘乃正又同順篤敘文武之道身其康強無有違過自罹疾害者子孫萬年厭飽乃德殷人亦永壽考也

武之道篤王俘殷乃承敘萬年其永觀朕子懷德

**纂疏**

張氏曰觀此書周公不敢當成王祗末用供王能祈天命語脉相類



安之乎所以春秋於魯之郊禘皆馬其僭成王之賜伯禽之受失可見也 戊辰王在新邑烝祭歲文

王駢牛一武王駢牛一王命作冊逸祝冊惟告周公

其後王賓殺禋咸格王入太室裸 此下史官記祭祀冊誥等事以附篇末也戊辰十二

月之戊辰日也是日成王在洛舉烝祭之禮曰歲云者歲舉之祭也周尚赤故用駢宗廟禮太牢此用特牛者命周公留後於洛故舉盛禮也逸史佚也作冊者冊書也逸祝冊者史逸為祝冊以告神也惟告周公其後者祝冊所載更不他及惟告周公留守其後之意重其事也王賓猶虞賓祀宋之屬助祭諸侯也諸侯以王殺牲禋祭祖廟故咸至也太室清廟中 王命周公後作冊逸

誥在十有二月 逸告者史逸誥周公治洛留後也在 惟周公誕

保文武受命惟七年 吳氏曰周公自留洛之後凡七年而薨也成王之留公也言誕保文武受命公之復成王也亦

言承保乃文祖受命民越乃光烈考武王故史臣於其終計 纂疏 張氏曰其年曰惟周公誕保文武受命惟七年蓋終始公之辭云

王大保文武所受命至此為七年矣○愚謂此三節史臣記王在洛以留公治洛之事祭告文武及命公也戊辰先儒謂七年十二月晦日唐孔氏推之謂是歲三月丙午肅閏九月辛未朔小則十二月三十日戊辰晦周十二月建亥之月也其言良是上言逸祝冊告文武之冊也下言作冊逸誥告命周公之冊也

重其事故既廟祭而冊祝先王又因廟祭而冊命周公也前言成辰而結以在十有二月明戊辰為十二月之戊辰言十二月而繼以惟周公誕保文武受命惟七年明十二月為七年之十二月也此乃古史記載倒文法也此章次第當在成王至洛舉大祀行大政之後與公別而歸錫之前今以尾王歸錫後遣使寧公之下次序倒矣其錯簡顛倒邪抑史追書之也不可考矣惟七年有二說蔡本葉吳今從張氏者按記云七年致政於成王王肅於金滕末云武王年九十三冬十一月崩其明年稱元年周公攝政遭流言東征三年而歸制禮作樂出入四年六年而成 七年營洛邑歸政成王武王崩時成王年已十三至是年二十五肅此說與記合七年始終班班可考葉吳留洛七年而後公薨之說未見所據何苦捨有據之說而從此乎古無年號只得表之曰周公誕保文武受命之七年亦如左氏所謂會於沙隨之歲溴梁之明年之類耳兼之康誥脫簡之惟三月哉生鬼蔡傳既曰周公攝政七年之三月矣此云惟七年乃曰留洛之後七年而薨豈應攝政至是恰第七年留後至薨又恰七年邪由此言之則知蔡傳二說自相抵牾悟康誥得之而洛誥失之也

多士 商民遷洛者亦有有位之士故周公洛邑初政以王命總呼多士而告之編書者因以名篇亦誥體也今古文皆

有○吳氏曰方遷商民於洛之時成周未作其後王與周公患四方之遠鑿三監之叛於是始作洛邑欲徙周而居之其曰昔朕來自奄大降爾四國民命我乃明致天罰移爾遐遜此事臣我宗多遜者述遷民之初也曰今朕作大邑於茲洛予惟四方罔攸賓亦惟爾多士攸服奔走臣我多遜者言遷民而後作洛也故洛誥一篇終始皆無欲遷商民之意惟周公既諾成王留治於洛之後乃



曰平來茲殷又曰王平殷乃承敘當時商民已遷於洛故其言如此愚謂武王已有都洛之志故周公黜殷之後以殷民反覆難制即遷於洛至是建成周造廬舍定疆場乃告命與之更始焉爾此多士之所以作也由是而推則召誥攻位之庶殷其已遷洛之民歟不然則受都今衛州也洛邑今西京也相去四百餘里召公安得捨近之友民而役遠之讐民哉書序以為成周既成遷殷頑民者謬矣吾固以為

**纂疏**

張氏曰周之頑民乃商之忠臣也。王非孔子所作也。氏曰篇名多士序乃以為頑民周公未始以殷民為頑成王命君陳始有無忿疾于頑之語夫殷民不附周謂之頑可也不忘殷謂之頑可乎故頑之一字康誥酒誥多士多方等書未嘗出諸口也。愚謂諸家過信小序所以昔朕來自奄等全解不通蔡說當矣。

**惟三月周公初于新邑洛用告商王士**

此多士之本序也三月月成王祀洛次年之

三月也周公至洛久矣此言初者成王既不果遷留公治洛至是公始行治洛之事故謂之初也曰商王士者貴之也

**纂疏**

孔氏曰周公致政明

年三月也。○王氏曰殷士遷成周從舊長治殷民故先告之殷士從殷民皆從矣。○愚謂蔡氏從孔氏以此三月為祀洛次年之三月皆以書之篇次意之耳。按召誥洛誥及脫簡在康誥之日月周公正以七年三月至洛此之三月即彼之三月也。得十經營之時便告商士此專為告商士而作故史自錄為一書而次之洛誥之後七年無兩七年三月亦無兩三月也。○陳氏傳良曰。王若曰此一篇皆稱王若曰則是相宅年之三月作之此不待辨而知也。

王若曰

爾殷遺多士弗弔旻天大降喪于殷我有周佑命將

天明威致王罰勅殷命終于帝

弗弔未詳意其為歎憫之辭當時方言爾也旻天秋天也主肅

殺而言歎憫言旻天大降災害而喪殷我周受眷佑之命奉將天之明威致王罰之公勅正殷命而革之以終上帝之事蓋推格命之公以開諭之也

**纂疏**

王氏曰終如受終于文祖之終。○愚謂弗弔與大誥同皆言殷弗為天所弔恤耳。

肆爾多士非我小

國敢弋殷命惟天不畀允罔固亂弼我我其敢求位

肆與康誥肆汝小子封同弋取也弋鳥之弋言有心於取之也呼多士誥之謂以勢而言我小國亦豈敢弋取殷命蓋我者培之傾者覆之固其治而不固其亂者天之道也惟天不與殷信其不固殷之亂矣惟天不固殷之亂故輔我周之治而天位自有所不容辭者我豈敢有求位之心哉

**纂疏**

蘇氏

曰固如推亡固存之固。○林氏曰告以天命之公使知殷失天命而亡則誰能與之周得天命而興則誰能廢之

惟帝不畀惟

我下民秉為惟天明畏

秉持也言天命之所不與即民心之所秉為民心之所秉為即天威之所明畏者也反

覆天民相因之理以見天之果不外乎民民之果不外乎天也詩言秉彜此言秉為者彜以理言為以用言也

**纂疏**

孔氏曰惟天不秉心為我皆是天明可畏之效。○愚按蔡本呂說今述孔註謂天自於民民心所歸即天命所在以天不畀殷民秉心為周觀之豈非天明畏之驗哉既曰惟



天不畀又曰惟帝不畀既曰將天明威又曰惟天明畏反我聞曰上帝

引逸有夏不適逸則惟帝降格嚮于時夏弗克庸帝

大淫泆有辭惟時天罔念聞厥惟廢元命降致罰

逸安也降格與呂刑降格同呂氏曰上帝引逸者非有形聲之接也人心得其安則疊疊而不能已斯則上帝引之也是理坦然亦何間於策策第樂喪其良心自不適於安耳帝實引之策實避之帝猶未遠絕也乃降格災異以示意嚮于祭祭猶不知警懼不能敬用帝命乃大肆淫佚雖有矯誣之辭而天罔念聞之仲虺所謂帝用不臧是也廢其  
**纂疏**陳氏大猷曰天心於君常欲導之於安大命降致其罰而夏祚終矣

也祭乃不適於逸自趨於危○呂氏曰天人之際惟極乃通治極而通格于皇天是也亂極亦通惟帝降格是也祭惡升聞故帝降格謹告災異以示所嚮董子曰天心仁愛人君必出災異以警戒之即降格之謂也自絕於天天亦絕之國之元命猶人之元氣有則生無則死者也  
**乃命爾先**

**祖成湯革夏俊民甸四方**  
甸治也伊尹稱湯旁求俊彥孟子稱湯區畫成湯立政之大經也周公反覆以夏商為言者蓋夏之亡即殷之亡湯之興即文武之興也商民觀是亦可以自反矣  
**自成湯至**

**于帝乙罔不明德恤祀**  
明德者所以脩其身恤祀者所以敬乎神也  
**亦惟天丕建**

**保乂有殷殷王亦罔敢失帝罔不配天其澤**  
亦惟天大建立保治

有殷殷之先王亦皆操存此心無敢失帝之則無不配天以澤民也  
**纂疏**薛氏曰天澤無所不浹王者澤天下敢失帝體承上天不敢失其心也以帝則言太深此之罔不明德與下文惟天不畀不明厥德相對恤祀與罔失帝配天澤皆自克明德而能然商先王以明德而得天命也如此  
**在今後嗣王誕罔顯于天矧曰其有聽念于先**

**王勤家誕淫厥泆罔顧于天顯民祇**  
後嗣王紂也紂大不明於天道況曰能聽念商先王之勤勞於邦家者乎大肆淫泆無復顧念天之顯道民之敬畏者也  
**惟時上帝不保降若茲大喪**  
商先王以明德而天丕建則而身戮也  
**惟天不畀不明厥德**  
商後王不明德而天不畀矣  
**凡**

**四方小大邦喪罔非有辭于罰**  
凡四方小大邦國喪亡其致罰皆言有可言者況商罪貫盈而罔奉辭以伐  
**纂疏**呂氏曰天也祖也民也人君所共畏也紂不聽念先王罔顧之者乎  
天顯民祇三畏皆亡無所不至矣○愚謂紂之眾惡皆自不明德而然其以不明  
**王若曰爾殷多士今惟我周王丕靈承**  
德而失天命也如此  
**帝事**  
靈善也大善承天之所為也武成言祗承上帝以遏亂略是也  
**有命曰割殷告勅于帝**



帝有命曰割殷則不得不戡定剪除告其勅正之事于惟我事不貳適

帝也武成言告于皇天后土將有大正于商者是也惟爾王家我適

上帝臨汝毋貳爾心惟我事不貳適之謂上帝既命侯于周服惟爾王家我適之謂言割殷之事非有私心一於從帝而無貳適則爾殷王家自不容不我適矣周不貳於帝殷其能貳於周乎蓋示以確然不可動搖之意而潛消頑民反側之情爾然聖賢事不貳適日用飲食莫不皆然蓋所以事

天也豈特割殷之事而已哉予其曰惟爾洪無度我不爾動

自乃邑三監倡亂予其曰乃汝大為非法非我爾予亦念天即于

殷大戾肆不正予亦念天就殷邦屢降大戾紂既死武庚又死故邪慝不正言當遷徙也

王曰猷告爾多士予惟時其遷居西爾非我一言肆赦之而不盡繩正之

人奉德不康寧時惟天命無違朕不敢有後無我怨時是也指上文殷大戾而言謂惟是之故所以遷居西爾非我一人樂如是之遷徙震動也是惟天命如此汝毋違越我不敢有後命謂有他日罰爾無我怨也

惟爾知惟殷先人有冊有典殷革夏命冊書典籍載殷改夏命之事正如是耳爾何獨疑於今乎

今爾其曰夏迪簡在王庭有服即其舊聞以開諭之也殷之先世有

在百僚予一人惟聽用德肆予敢求爾于天邑商予

惟率肆矜爾非予罪時惟天命周公既舉商革夏事以諭頑民頑民復以商革夏事責周

謂商革夏命之初凡夏之士皆啓迪簡拔在商王之庭有服列於百僚之間今周於商士未聞有所簡拔也周公舉其言以大義折之言爾頑民雖有是言然予一人所聽用者惟以德而已故予敢求爾于天邑商而遷之于洛者以冀率

德改行焉予惟循商故事矜恤于爾而已其不爾用者非我之罪也是惟天命如此蓋章德者天之命今

頑民滅德而欲求用得乎

纂疏唐孔氏曰從殷適洛南行而西向故為西奉德猶秉德

林氏曰朕不敢有後時而稽留謂急於順天命也

陳氏大猷曰迪簡王庭職之大者有服百僚職之小者聽察有德者而用之

陳氏經曰聽用德者爾有德我何敢不用爾無德我何敢苟用商士所言皆私情王所言皆天理不擇賢否而非天理矣

呂氏曰故我敢以德而求爾於天邑商爾其修德以應我之求不可援前此而必我之辭也商猶謂之天邑者蓋言其地舊為天子之都理當富于賢德敢

求亦敬賢之意重其事而敬其辭裁之者固甚正待之者亦甚厚矣

王曰多士昔朕來自奄予大降爾四國民命我乃明致天罰

移爾遐逝比事臣我宗多遜降猶今法降等云者言昔我來自商奄之時汝四國之民罪皆應死

我大降爾命不忍誅戮乃止明致天罰移爾遠居於洛以親比臣我宗周有多遜之美其罰蓋亦甚輕其恩固已甚厚今猶有所怨望乎詳此章則商民之遷

書集傳纂疏卷五

十八



固已

**纂疏**

陳氏大猷曰奄東方國與淮夷三監同助武庚以叛周公東征一

久矣舉而誅四國獨言來自奄者代奄在後誅奄即來也四國殷管蔡霍也以親我事我臣我宗法我周濟濟多遜之風○林氏曰自洛而視殷之故地則殷為遠故以遷之於洛為移爾遐逝○真氏曰蔡說文勢順但遷洛恐不可言遐逝愚謂武王自鎬伐商言逝矣西土之人則自商遷洛豈不可言以爾遐逝否則以遐逝指朝歌謂移爾自於遐逝亦可也

爾殷多士今予惟不爾殺予惟時命有申今朕作大

邑于茲洛予惟四方罔攸賓亦惟爾多士攸服奔走

臣我多遜

以自奄之命為初命則此命為申命也言我惟不忍爾殺故申明此命且我所以營洛者以四方諸侯無所賓禮之地亦惟爾

等服事奔走臣我多遜而無所處故也詳此章則遷民在營洛之先矣吳氏曰來自奄稱昔者遠日之辭也作大邑稱今者近日之辭也移爾遐逝此事臣我宗多遜者期之之辭也攸服奔走臣我多遜者果能之辭也以此又知遷民在前而作洛在後也

乃尚寧幹止

幹事止居也爾乃庶幾有爾田業庶幾安爾所事安爾之遷舊矣孔氏不得其說而以得反所生釋之於文義似矣而事則非也

爾克敬天惟畀矜爾爾不

克敬爾不啻不有爾土予亦致天之罰于爾躬

敬則言動無不

循理天之所福吉祥所集也不敬則言動莫不違悖天之所禍刑戮所加也豈特竄徙不有爾土而已哉身亦有所不能保矣

宅爾邑繼爾居爾厥有幹有年于茲洛爾小子乃與

從爾遷

邑四井為邑之邑繼者承續安居之謂有營為有壽考皆于茲洛焉爾之子孫乃與自爾遷始也夫自亡國之末裔為起家之

始祖頑民雖愚亦知所擇矣

**纂疏**

馬氏曰幹

王曰又曰時予乃或言爾攸

居

王曰之下當有關文以多方篇末王曰又曰推之可見時我或有所言皆以爾之所居止為念也申結上文爾居之意

**纂疏**

王氏曰

王曰下有脫簡又曰下有脫文

**無逸**

逸者人君之大戒自古有國家者未有不以勤而興以逸而廢也益戒舜曰罔遊于逸罔淫于樂舜大聖也益猶以

是戒之則時君世主其可忽哉成王初政周公懼其知逸而不知無逸也故作是書以訓之言則古昔必稱商王者時之近也必稱先王者王之親也舉三宗者繼世之君也詳文祖者耳目之所逮也上自天命精微下自畝畝艱難閭里怨詛無不具載豈成王之

所當知哉實天下萬世人主之龜鑑也是篇凡七更端周公皆以嗚呼發之深嗟永嘆其意深遠矣亦訓體也今文古文皆有

**纂疏**

張氏曰周召之於成王所陳在敬所戒在逸蓋敬則不逸逸則不敬敬逸之分而享年之壽夭享國之延促判焉召

書集傳纂疏卷五

十九



公以敬陳於前周公以無逸戒於後此周召所以為周召○陳氏大猷曰逸者萬惡之根無逸者萬善之本無逸一書所以為百代元龜○呂氏曰逸者禍亂之源三年東征以定外亂治其末流耳無逸者治源之書也蓋作于作洛之後成王即政之初

周公曰嗚呼君子所其無逸

靜猶處所也君子以無逸為所動

謂所

纂疏 東萊解所為居字先生曰若某則不敢如此說恐有脫字則不可知若說不行而必強立一說雖若可觀只恐道理不如此○孔氏

曰君子之道所在其在無逸豫○呂氏曰凡人乍勤乍怠亦有無逸之時然能暫而不能居非所其無逸者也惟君子以無逸為所如魚之于水鳥之于林有不可得而離者焉○陳氏大猷曰所若北辰居其所之而不移動也○李氏杞曰所安也如止其所安於無逸也○愚按所其無逸與王敬作所不可不敬德朱子皆不以處所安居之意釋之懼其巧也然呂說儘可喜外此則孔註之說林氏亦本之此外則無說矣呂說朱子非之蔡氏仍本之真氏乙記全不取呂蔡說大學衍義

先知稼穡之艱難乃逸則知小人之依

則又全采呂說云 先知稼穡之艱難乃逸者以勤居逸也依者指稼穡而言小民所恃以為生者也農之依田猶魚之依水木之依土魚無水則死木無土則枯民非稼穡則無以生也故舜自耕稼以至為帝禹稷躬稼以有天下文武之基起于后稷四民之事莫勞于稼穡生民之功莫盛于稼穡周公發無逸之訓而首及乎此有以哉 林氏曰惟以稼穡艱難為念而不留意於逸乃所以能逸蓋好逸者未必逸無逸者乃能逸也○呂氏曰此非始於憂勤終於逸樂

纂疏

之論也蓋言先備嘗稼穡之艱難乃處於安逸則深知小人之所依未知稼穡艱難而遽處安逸與一官室起一力役視若易然而民有不得其死者矣成王生於深宮遠處人上公深為之懼故以此言警之若以始難終逸釋之是乾健之體有時而息矣後世漸不克終之患未必非此論啓之○陳氏經曰乃逸非先艱難而後逸樂也艱難之中自有逸樂之理君子當以艱難為逸不當以逸為逸也○張氏載曰周自后稷以農事開國歷世相傳相與咨嗟歎息服習乎艱難而詠歌其勞若此實王業之根本也周公告成王詩有七月皆言農桑之候書有無逸欲其知稼穡小人之依憂深思遠端在於此治常生於敬畏而亂常起於驕逸使為國者每念稼穡之艱難而心不存焉者寡矣此心常存則驕逸何自而生豈非治所由興歟○陳氏大猷曰所其無逸知小人之依此一編之綱領後章三宗文王及怨詈等皆反覆推明此意○愚按先知稼穡之艱難乃逸以為先艱難而後可謀安逸固非矣以為艱難乃所以為安逸亦未也蓋君逸於上君本逸也惟以勤居逸則君雖逸而能無逸呂氏此論超出諸家下文厥子不知稼穡之艱難乃逸乃諺既誕文勢似若六字一句蔡氏提出謂此為以逸為逸與上文之乃逸以勤居逸者為對提得精神如兩眼然雖六字仍作一句讀亦不妨如此說云 相小人厥父母

否則侮厥父母曰昔之人無聞知

不知稼穡之艱難乃逸者以逸為逸也但語曰諺言視小民

其父母勤勞稼穡其子乃生於養不知稼穡之艱難乃縱逸自恣乃習俚巷鄙語既又誕妄無所不至不然則又訛侮其父母曰古老之人無聞無知徒自勞



苦而不知所以自逸也昔劉裕奮農畝而取江左一再傳後子孫見其服用反笑曰田舍翁得此亦過矣此正所謂昔之人無聞知也使成王非周公之訓安知其不以公劉后稷為田舍翁乎

**纂疏**

蘇氏曰農夫之子生而飽煖且不知艱難況於王乎南史宋高祖劉裕之孫孝武帝駿壞高祖所居陰室為玉燭殿牀頭有土障壁上掛葛燈籠麻繩拂表頭因盛稱高祖儉德駿曰田舍翁得此已為過矣

周公曰嗚呼我聞

曰昔在殷王中宗嚴恭寅畏天命自度治民祇懼不

敢荒寧肆宗中之享國七十有五年

中宗太戊也嚴則莊重恭則謙抑寅則欽肅畏

則戒懼天命即天理也中宗嚴恭寅畏以天理而自檢律其身至於治民之際亦祇敬恐懼而不敢怠荒安寧中宗無逸之實如此故能有享國永年之效也按書序太戊有原命咸乂等篇意述其當時敬天治民之事今無所攷矣

**纂疏**

福下文言逸樂之損壽○呂氏曰上既論無逸之理此復舉無逸之君以示之法此中宗無逸之實嚴恭寅畏合而言之敬也因桑穀而修省亦其畏天命之一端天人一理既畏天命必不敢輕下民祇懼不敢荒寧皆敬也惟敬故壽也主靜則悠遠博厚自強則堅實精明操存則血氣循軌而不亂收斂則精神內固而不浮凡此皆敬之方壽之理也自此至文王其壽莫非此理○陳氏經曰以天命之理自為法度凡身所躬行合於法度者無非天命之流行○李氏祀曰無逸必寡慾寡慾而不壽者鮮矣逸樂必多慾多慾而能全生者亦鮮矣既以無慾致壽為勸又以逸樂損壽為戒使前有所慕則知無逸之可法後有所警則知逸樂之不可縱

其

在高宗時舊勞于外爰暨小人作其即位乃或亮陰

三年不言其惟不言言乃雍不敢荒寧嘉靖殷邦至

于小大無時或怨肆高宗之享國五十有九年

高宗武丁也

即位之時其父小乙使久居民間與小民出入同事故于小民稼穡艱難講嘗知之也雍和也發言和順當于理也嘉美靖安也嘉靖者禮樂教化蔚然于安居樂業之中也漢文帝與民休息謂之靖則可謂之嘉則不可小大無時或怨者萬民咸和也乃雍者和之發于身嘉靖者和之達于政無怨者和之著于民也餘見說命高宗無逸之實如

**纂疏**

呂氏曰小大無時民氣大和導迎和氣此故亦有享國永年之效也

其在祖甲不義惟王舊為小人

作其即位爰知小人之依能保惠于庶民不敢侮鰥

寡肆祖甲之享國三十有三年

史記高宗崩子祖庚立祖庚崩弟祖甲立則祖甲高宗之子祖

庚之弟也鄭玄曰高宗欲廢祖庚立祖甲祖甲以為不義逃于民間故云不義惟王○按漢孔氏以祖甲為太甲蓋以國語稱帝甲亂之七世而殞孔氏見此等記載意為帝甲必非周公所稱者又以不義惟王與太甲茲乃不義文似遂以此稱祖甲者為太甲然詳此章舊為小人作其即位與上章爰暨小人作其



即位文勢正類所謂小人者皆指微賤而言非謂儉小之人也作其即位亦不見太甲復政思庸之意又按邵子經世書高宗五十九年祖庚七年祖甲三十五年世次歷年皆與書合亦不以太甲為祖甲况殷世二十有九以甲名者五帝以太以小以沃以陽以祖別之不應二人俱稱祖甲國語傳訛承謬旁記曲說不足盡信要以周公之言為正又下文周公言自殷王中宗及高宗及祖甲及我周文王及云者因其先後次第而枚舉之辭也則祖甲之為祖甲而非太甲明矣

**纂疏**

真氏曰祖甲或以為太甲或以為帝甲攷之經世書二君享國皆次非世次者得之○林氏曰言三宗不言湯繼世之君與成王同也○陳氏經曰中宗近生知高宗學知祖甲困知者也○愚謂太甲帝甲皆有證據而太甲

較分明經世書虞三及字皆不足援以辨太甲為商賢君帝甲淫亂失道商本紀言之國語又云云難必專主一說姑二說並

後立王生則逸生則逸不知稼穡之艱難不聞小人

之勞惟耽樂之從自時厥後亦罔或克壽或十年或

七八年或五六年或四三年

過樂謂之耽泛言自三宗之後即君位者生則逸豫不知稼穡之艱難不聞小人之勞惟耽樂之從伐性喪生故自三宗之後亦無能壽考遠者不過十年七八年近者五六年三四年爾耽樂愈甚則享年也凡人莫不欲壽而惡天此篇專以享年永永為言

**纂疏**

陳氏經曰逸樂人所好然所好有甚所以開其所欲而禁其所當戒也

逸樂艱難人所惡然所惡有甚于艱難者苟以逸樂而促壽奚為而不公之言奪常情之好惡而示以所甚好甚惡也○蘇氏曰人莫不好逸豫而甚好者生也以其所甚好禁其所好庶幾其信然猶有不信者以逸豫未必害生也漢武唐玄豈無欲者而壽如此夫多欲不享國者皆是也二君千一而已豈可以藉口哉○呂氏曰憂勤必壽逸豫必夭此周公格言大訓非特以戒成王實萬世之主之龜鑑也蓋人之一心苟能操存則精神思慮日由乎天理之中其壽固可必孔子所謂仁者壽詩所謂樂只君子萬壽無期亦即其理推之耳後世之君憚憂勤而恣逸樂伐性傷生靡所不至乃慕神仙之術以求長年愚之甚

周公曰嗚呼厥亦惟我周太王王季克自抑畏

異世也故又即我周先王告之言太王王季能自謙抑謹畏者蓋將論文王之無逸故先述其源流之深長也大抵抑畏者無逸之本縱肆怠荒皆矜誇無忌憚者之為故下文言文王曰柔曰恭曰

**纂疏**

陳氏大猷曰克自者真能自用不敢皆原太王王季抑畏之心發之耳

之也如制忿欲去奢侈皆是也畏敬畏也人所以肆行無畏不能自抑故也抑其私欲則必畏天命畏祖宗畏小民矣

康功田功

甲服猶禹所謂惡衣服也康功安民之功田功養民之功言文王于衣服之奉所性不存而專意于安養斯民也甲服蓋舉一端而言宮室飲食自

微柔懿恭懷保小民惠鮮鰥寡自朝至于日中是不遑暇食用咸和萬民

微懿皆美也具日昃也柔謂之微則非柔懦之柔恭



謂之懿則非足恭之恭文王有柔恭之德而極其微懿之盛和易近民于小民則懷保之于鰥寡則惠鮮之惠鮮云者鰥寡之人垂首喪氣資予賙給之使之有生意也自朝至于日之中自至于日之具一食之頃有不遑暇欲咸和萬民使無一不得其所也文王心在乎民自不知其勤勞如此豈秦始皇衡石程書隋文帝衛士傳餐代有司之任者之為哉立政言罔攸兼于庶言庶獄庶慎則文王又若無所事事者不讀無逸則無以知文王之勤不讀立政則無以知文王之逸合二書觀之則

文王之所從事可知矣 文王不敢盤于遊田以庶邦惟正之

供文王受命惟中身厥享國五十年

遊田國有常制文王不敢盤遊無度上不濫費故下無過取而能以庶邦惟政之供于常貢正數之外無橫斂也言庶邦則民可知文王為西伯所統庶邦皆有常供春秋貢於霸主者班班可見至唐猶有送使之制則諸侯之貢方伯舊矣受命言為諸侯也中身者漢孔氏曰文王九十七而終即位時年四十七言中身舉全數也上文崇素儉恤孤獨勤政事戒遊佚皆文王無逸之實

**纂疏** 問微柔懿恭是一字是二字曰二字柔者須微恭故其享國有歷年之永者須懿柔而不微則姑息微而不懿則非由中出以知稼穡之艱難○陳氏大猷曰卑服非止惡衣服凡服用皆卑損○呂氏曰力不分于奉已故功全歸于恤民惠澤之使鮮鮮有生意盤遊田曰不敢翼翼之小心也此章言文王家法凡無逸之條目如崇儉素重農畝恤窮困勤政事戒遊田損橫斂大略皆備其稱文王之壽即前章之意以此為防後世猶有為文王憂勤損壽之說以啓人主之好逸如鄭玄者○愚按孔氏以即田功為知

稼穡艱難甚好知稼穡艱難乃無逸之根本一篇之綱領也 周公曰嗚呼

迪哲四君皆由于此彼生則逸之君只為不知稼穡艱難耳 繼自今嗣王則其無淫于觀于逸于遊于田以萬民

惟正之供 則法也其指文王而言淫過也言自今日以往嗣王其法文王

無過于觀逸遊田以萬民惟正賦之供上文言遊田而不言觀 無皇曰今日耽樂乃非民攸訓非

逸以大而包小也言庶邦而 天攸若時人不則有愆無若殷王受之迷亂酗于酒

德哉 無與毋通皇與遑通訓法若順則法也毋自寬假曰今日姑為是耽樂

也一日耽樂固若未害然下非民之所法上非天之所順時人大法其過逸之行猶商人化受而崇飲之類故繼之曰毋若商王受之沈迷酗于酒德哉 醜酒謂之德者德有凶有吉韓子所謂道與德為虛位是也 陳氏經曰兩惟正之供皆不以貢賦為吾逸樂之用也觀逸遊田人君未嘗無持不可過其則耳一日暫樂若未害也而以為不可者蓋此心不可以斯須忘斯須而忘是放其心自此以往不可收拾矣○呂氏曰雖戒成王實欲後嗣共守此訓故言繼自今嗣王觀覽以舒其目安逸以休其身遊豫以省風俗田獵以習武備人君不能無不可過耳過則人欲肆而入于亂亡矣故欲其無淫過必絕之使無則迫感拘制矣觀逸遊田橫斂之源四者既省用有常經始耽樂者每自怨曰今日耽樂耳是心一流將一日二日駸駸終身不返矣苟不戒一日之耽樂必至于紂之徒無違曰今日耽樂蓋原淫樂之始使之深絕其微無



若殷王受蓋要淫樂之終使知必至此極始終備矣○林氏曰隱公觀魚莊公觀社觀也唐敬宗日晏坐朝逸也周穆王所至有車轍馬迹遊也太康政洛表田也皆淫于此者○真氏曰前舉三宗後舉文王俾王知所法又舉紂俾王知所戒紂之惡無不有酒其最也人無智愚皆知憂勤必享國逸樂必戕生惟沈湎于酒心志昏亂則雖死亡在前亦不知畏故欲無逸則不可○周公曰酒酣酒則不能無逸宜公專以此申戒也○孔氏曰以酒為凶曰

嗚呼我聞曰古之人猶胥訓告胥保惠胥教誨民無

或胥請張為幻胥相訓誡惠順請誑張誕也變名易實以眩觀者曰幻歎息言古人德業已盛其臣猶且相與誡告之相與保

惠之相與教誨之保惠者保養而將順之非特誡告而已也教誨則有規正成就之意又非特保惠而已也惟其若是是以規聽思慮無所蔽塞好惡取予明而不悖故當時之民纂疏呂氏曰訓告教誨皆見于言語保惠則謂護於日無或敢詐誕為幻也

也忠言交進纂疏用功用相表裏也○愚案訓誨忠言也請張邪說則邪說難行

此厥不聽人乃訓之乃變亂先王之正刑至

于小大民否則厥心違怨否則厥口詛祝正刑正法也言成王於上古人胥訓告保惠教誨之事而不聽信則人乃法則之君臣上下師師非度必變亂先王之正法無小無大莫不盡取而紛更之蓋先王之法甚便於民甚不便於縱侈之君如省刑罰以重民命民之所便也而君之殘酷者則必變亂之如尊賦斂以厚民生民之所便也而君之貪侈者則必變亂之厥心違怨者怨之

蓄于中也厥口詛祝者怨之形于外也為人上而使民心口交惡纂疏陳氏其國不危者未之有也此蓋治亂存亡之機故周公懼言之

曰承上章無怨成和之意遂及于違怨詛祝違怨者無怨之反也○唐孔氏曰請神加殃謂之詛以言告神謂之祝○真氏曰兩至于小大當作一義上言至于小大無時或怨下云至于小大

民否則厥心違怨蓋皆為民而言

周公曰嗚呼自殷王中宗及

高宗及祖甲及我周文王茲四人迪哲迪蹈哲智也孟子以知而弗去為智之實

之曰小人怨汝詈汝則皇自敬德厥愆曰朕之愆允

若時不啻不敢含怒詈罵言也其或有告之曰小人怨汝詈汝則皇自敬德反諸其身不尤其人其所誣毀之愆

安而受之曰是我之愆允若時者誠實若非止隱忍不敢藏怒也蓋三宗文王于小民之依心誠知之故不暇責小人之過言且因以察吾身之未至怨詈之語乃所樂聞是豈特止纂疏唐孔氏曰皇大也○朱氏方大曰聞謗而自干隱忍含怒不發而已哉反以敬德則凡怨詈之來皆箴規之益吾方資之以自反何止不敢含怒於心而已非發於中心之誠惟不敢含怒而止是僅能恕人之言未盡反已之功也今三宗深知小民之依樂聞小民之怨言藉以反身脩德不但含怒而已非允迪其哲能如是乎○陳氏大猷曰四君至明故如此凡聞謗而責人皆不明所致



乃或譎張為幻曰小人怨汝詈汝則信之則若時不  
永念厥辟不寬綽厥心亂罰無罪殺無辜怨有同是

叢于厥身

綽大叢聚也言成王于上文三宗文王迪哲之事不肯聽信則小人乃或詐誕變置虛實曰小民怨汝詈汝則聽信之則如

是不能永念其為君之道不能寬大其心以詐誕無實之言羅織疑似亂罰無罪殺戮無辜天下之人受禍不同而同一怨皆叢乎人君之一身亦何便于此哉大抵無逸之書以知小人之依為一篇綱領而此章則申言既知小人之依則當蹈其知也三宗文王能蹈其知故其智次寬平人之怨詈不足以芥蒂其心如天地之于萬物一于長育而已其悍疾憤戾夫豈私怒于其間哉天地以萬物為心人君以萬民為心故君人者要當以民之怨詈為己責不當以民之怨詈為己怒以為己責則民安而君亦安以  
**纂疏**林氏曰以譎張之說妄殺為已怒則民危而君亦危矣吁可不戒哉  
如幽厲監謗秦立誹謗法之類○范氏曰明君惟聽正直故讒慝之言不入于耳暗君好聽讒佞故欺誑之言日至前君當脩德以弭怨不可刑殺以止怨刑殺以止怨皆自幻言有以惑之所潰不可收拾矣○陳氏經曰以一人之身當天下之怨皆自幻言有以惑之使人主憂勤則心莊氣肅而一身和邪說進小人怨殺戮肆行而天下失其和此樂則心有所蠱壞而一身失其和邪說進小人怨殺戮肆行而天下失其和此壽所以短也推言人主之壽下及小人怨詈之情可謂深切矣○夏氏曰始之怨詈猶有限也至此普天同怨怨叢于一身矣民氣如此欲享國長久得乎意蓋在言外也○呂氏曰無逸始以逸豫為戒終以棄忠言惑邪說壞法度治誹

謗結之惟無逸然後能去是病而所以保無逸亦不過戒是數者而已○愚謂末章承上章以論處怨詈之道召民和而使自無時或怨上也因怨言而自反次也以殺罰止怨而怨叢無矣矣周公以怨詈等事寬  
**周公曰嗚呼嗣**

王其監于茲

茲者指上文而言也無逸一篇七章章首皆先致其咨嗟詠歎之意然後及其所言之事至此章則于嗟歎之外更無他

語惟以嗣王其監于茲結之所謂言有盡而意則無窮成王得無深警于此哉

君奭

召公告老而去周公留之史氏錄其告語為篇亦詰體也

文皆有○案此篇之作史記謂召公疑周公當國踐祚唐孔氏謂召公以周公嘗攝王政今復在臣位葛氏謂召公未免常人之情以爵位先後介意故周公作是篇以諭之陋哉斯言要皆為序文所誤獨蘇氏謂召公之意欲周公告老而歸為近之然詳本篇旨意迺召公自以盛滿難居欲避權位退老厥邑周公  
**纂疏**召公反復告諭以留之爾熟復而詳味之其義固可見也  
這意思曉不得若論事了儘未在看來是見成王已臨政便也小定了許多事周公自可了得所以求去○召公不悅只小序如此說裏面却無此意這只是召公要歸周公留他說朝廷不可無老臣這箇只大綱綽得箇意脉子便住不要逐箇字去討便無理會處這箇物事難理會又曰召公不悅蓋以為周公歸政之後不當復留而已亦老而當去故周公言我二人不可不留之意又歷道



古聖賢倚賴老成以固其國家之事周公不知其人如何其言聲  
 牙難曉如周書中周公之言便難讀如君奭立政是也最好者無  
 逸中間用字亦有講張為幻之語至若周官蔡仲等篇却是官樣  
 文字必出當時有司潤色之辭非純周公語也○呂氏曰召公以  
 盛滿欲去周公反復留之後世權臣相軋排使去者有之挽之留  
 者鮮矣大臣之秉心公則深恐無助私則惟恐不專也又曰成功  
 不可居洛邑成而周公告歸召公亦同此心也已而成王留周公  
 周公幡然改矣召公猶守欲退之心也周公遂力留之及其既喻  
 非特留于一時終相成王且相康王身任託孤之責而不辭惟不  
 苟于隨所以篤于信也○陳氏經曰周召相王營洛功成二公皆  
 欲去矣周公既為王留召公去志未變二公同心一體周公既留  
 召公安得獨退洛誥王留周公之書君奭周公留召公之書也○  
 陳氏大猷曰或謂周公去朝居洛召公獨執政柄所以欲去今以  
 洛誥君陳攷之周公故居洛以化殷民以無逸蔡仲等攷之周公  
 未嘗不在朝以輔大業意其往來鎬洛之間也方是時洛邑雖成  
 而殷民尚未孚四方雖定而天命人心尚未固宜周公諄諄于留  
 召公

周公若曰君奭

君者尊之之稱奭召公名也  
古人尚質相與語多名之

弗弔天降喪于

殷殷既墜厥命我有周既受我不敢知曰厥基永孚

于休若天棐忱我亦不敢知曰其終出于不祥

不祥者  
休之反

也天既下喪亡于殷殷既失天命我有周既受之矣我不敢知曰其基業長信  
 于休美乎如天果輔我之誠邪我亦不敢知曰其終果出于不祥乎○案此篇  
 周公留召公而作此其言天命吉凶雖曰我不敢知然其懷

惻危懼之意天命吉凶之決實主于召公留不留如何也  
 ○呂氏曰自後世之私觀之殷之禍周之福也述殷之亡亦曰弗弔聖賢公天  
 下之心也人之于天或恃而不自修或懼而不自強謂永孚于休恃而不自修  
 也謂天必福己也謂終出不祥懼而不自強也謂天必禍己也皆  
 非也○愚謂此數句與召誥不敢知曰有歷年不其延語脉略同

已曰時我我亦不敢寧于上帝命弗永遠念天威越

我民罔尤違惟人在我後嗣子孫大弗克恭上下遏

佚前人光在家不知

尤怨違背也周公歎息言召公已嘗曰是在我  
 而已周公謂我亦不敢苟安天命而不永遠念  
 天之威于我民無尤怨背違之時也天命民心去就無常實惟在人而已今召  
 公乃忘前日之言翻然求去使在我後嗣子孫大不能敬天敬民驕慢肆侈過  
 絕佚墜文武光顯可  
 纂疏 諸誥多是長句如弗永遠念天威越我民罔尤違  
 得謂在家而不知乎 只是一句越只是及罔尤違是總說上天與民之  
 意漢藝文志註謂誥是曉諭民若不速曉則  
 約束不行便是誥辭如此只是欲民易曉

天命不易天難諶乃其



墜命弗克經歷嗣前人恭明

天命不易猶詩曰命不易哉命不易保天難諶信乃其墜失天

命者以不能經歷繼嗣前人之恭明德也吳氏曰弗克恭故不能嗣前人之恭德過佚前人之光故不能嗣前人之明德

且非克有正迪惟前人光施于我冲子

吳氏曰小子自謙之辭也非克有正

亦自謙之辭也言在今我小子且非能有所正也凡所開導惟以前人光大之德使益焜耀而付于冲子而已以前言後嗣子孫過佚前人光而言也

曰天不可信我道惟寧王德延天不庸釋于文王受

命又曰者以上文言天命不易天難諶此又申言天不可信故曰又曰天固不可信然在我之道惟以延長武王之德使天不容捨文王所受之命也

纂疏

愚謂周公舉召公前日之言以質之謂君昔已嘗言是其責在我矣周尤違背也惟人上下疑有闕誤若果委之而去使我後嗣子孫無所補助將大

不能敬天故民而至于過佚前人之光顯此時吾等可諉以退老在家而不知乎天命不易保天難諶信恐其墜命者以嗣君涉歷未深弗能經歷而嗣前人恭明之德故也我非能有正我所啓迪惟以前人光明之德施及于我冲子而已施去聲如詩所謂施于孫子此章大意謂今日天命人心未為固成王經歷未為深所當輔之以嗣前人之光延長世德疑固天命吾等當留而不當去也此篇句語多有難曉公曰君奭我聞在昔成湯既受命時只得其大意可也

則有若伊尹格于皇天在太甲時則有若保衡在太

戊時則有若伊陟臣扈格于上帝巫咸又王家在祖

乙時則有若巫賢在武丁時則有若甘盤

時則有若者言當其時有如此

人也保衡即伊尹也見說命太戊太甲之孫伊陟伊尹之子臣扈與湯時臣扈二人而同名者也巫氏咸名祖乙太戊之孫巫賢巫咸之子也武丁高宗也甘盤見說命○呂氏曰此章序商六臣之烈蓋勉召公匹休于前人也伊尹佐湯以聖輔聖其治化與天無間伊陟臣扈之佐太戊以賢輔賢其治化克厭天心自其徧覆言之謂之天自其主宰言之謂之帝書或稱天或稱帝各隨所指非有重輕至此章對言之則聖賢之分而深淺見矣巫咸止言其又王家者咸之為治功在王室精微之蘊猶有愧於二臣也亡書有咸又四篇其又王家之實歟巫賢甘盤而無指言者意必又次于巫咸也○蘇氏曰殷有賢聖之君七此獨言五下文云殷禮陟配天豈配祀于天者止此五王而其臣借配食于廟乎在武丁時不言傳說豈傳說不配食于配天之王乎其詳不得而聞矣

陳保又有殷故殷禮陟配天多歷年所

陟升遐也言六臣循推此道有陳列

之功以保又有殷故殷先王終以德配天而享國長久也

纂疏

葉氏曰祭禮上陟而配天猶言郊祀后稷以配天宗祀文王于明堂以配乎上帝



唐孔氏曰多歷年之欠所天惟純佑命則商實百姓王人罔不秉德

明恤小臣屏侯旬矧咸奔走惟茲惟德稱用又厥辟故一人有事于四方若卜筮罔不是孚

子言不信仁賢則國空虛是也稱舉也亦秉持之意事征伐會同之類承上章六臣輔君格天治致遂言天佑命有商純一而不雜故商國有人而實內之百官著姓與夫王臣之微者無不秉持其德明致其憂外之小臣與夫藩屏侯甸矧皆奔走服役推此之故惟德是舉用又其君故君有事于四方如龜之卜如著之筮天下無不敬信之也

**纂疏**

孔氏曰天大佑助其王命使商家百姓豐實自湯至武

以至公撫恤在內則及卑賤之小臣在外則均藩屏之侯甸恩浹內外公平周溥斯乃所秉之君德也後之君變昵左右如幽王之私趣馬偏愛一國如平王之貳于虢非不恤之可謂之明恤乎用又者規諫箴誨以治之也○愚按以格天格帝分聖賢昭受上帝天其申命亦有分乎率惟茲有陳六臣率皆循此有陳列也或曰陳久也陟如新陟王之陟殷禮陟方之王祀之以配天也實百姓民生富實也王人如言君人也此章序商六臣之烈以留召公六臣輔佐商業如此召公可不監之而求去乎

**公曰君奭天壽平格保乂有殷有殷嗣天**

**滅威今汝永念則有固命厥亂明我新造邦**

呂氏曰坦然無私之

謂平格者通徹三極而無間者也天無私壽惟至平通格于天者則壽之伊尹而平六臣能盡平格之實故能保乂有殷多歷年所至于殷紂亦嗣天位乃驟羅滅亡之威天曾不私壽之也固命者不墜之天命也今召公勉為周家久永之念則有天之固命其治效亦赫然明著于我新造之邦而身與國俱顯矣

**纂疏**

孔氏曰言天壽平至之君故安治有殷殷嗣于紂不能平至天滅亡之加之有威今汝長念平至者安治反是者滅亡以為法戒則有堅固之

命其治理足以明我新成國矣**公曰君奭在昔上帝割申勸寧王之德其**

**集大命于厥躬**

申重勸勉也在昔上帝降割于殷申勸武王之德而集大命于其身使有天下也

**纂疏**

曰天

勸文王又勸武王故曰申勸如言天復命武王○真氏曰文王美里之難乃天降割以申勸其德也文王生知本不待勸天乃降割以勉之故曰申勸○愚案有殷嗣天滅威與割申勸皆不可通記緇衣作周田觀文王之德記固訛矣書果是乎寧王孔註以為文王蔡氏以為武王此處必有訛缺**惟文**

**王尚克修和我有夏亦惟有若虢叔有若閔天有若**

**散宜生有若泰顛有若南宮括**

號叔文王弟閔散泰南宮皆氏天宜生顛括皆名言文王庶幾

能修治變和我所有諸夏者亦惟有虢叔等五臣為之輔也康誥言一二邦以修無逸言用咸和萬民即文王修和之實也**又曰無能**

**往來茲迪彝教文王蔑德降于國人**

蔑無也夏氏曰周公前既言文王之興本此五



臣故又反前意而言曰若此五臣者不能為文王往來奔走于此導迪其常教則文王亦無德降及于國人矣周公反復以明其意故以又曰更端發之

惟純佑秉德迪知天威乃惟時昭文王迪見冒聞于

上帝惟時受有殷命哉言文王有此五臣者故亦如殷為天純佑命百姓王人罔不秉德也上既反言文王

若無此五臣為迪彛教則亦無德下及國人故此又正言亦惟天乃純佑文王蓋以如是秉德之臣蹈履至到實知天威以是昭明文王啓迪其德使著見于上覆冒于下而升聞于上帝惟是之故遂能受有殷之天命也纂疏愚謂此言以文王之聖猶不可無五臣之助也武王惟茲

四人尚迪有祿後暨武王誕將天威咸劉厥敵惟茲

四人昭武王惟冒丕單稱德號叔先死故曰四人劉殺也單盡也武王惟此四人庶幾迪有天祿

其後暨武王盡殺其敵惟此四人能昭武王遂覆冒天下天下大盡稱武王之德謂其達聲教于四海也文王冒西土而已丕單稱德惟武王為然于文王言命于武王言祿者文王但受天命至武王方富有天下也呂氏曰師尚父之事文武烈莫盛焉不與五臣之列蓋一時議論或詳或略隨意而言主于留召公而非欲為纂疏呂氏曰此四人尚蹈有祿位言故老猶存也○林氏曰死者人物評也稱不祿四人猶及武王之世故曰尚迪有祿○愚謂此言以武王之聖猶不可無四臣之助也上言殷先王猶有賴於六臣此二章言周文武猶有賴於五臣四臣召公可不鑒之而遠求去乎留之之意切矣今

在予小子旦若游大川予往暨汝奭其濟小子同未

在位誕無我責收罔勗不及考造德不降我則鳴鳥

不聞矧曰其有能格小子旦自謙之稱也浮水曰游周公言承文武之業懼不克濟若浮大川罔知津涯豈能獨濟

哉予往與汝召公其共濟可也小子成王也成王幼冲雖已即位與未即位同誕大也大無我責上疑有關文收罔勗不及未詳考造德不降言召公去則耆老成人之德不下于民在郊之鳳將不復得聞其鳴矣況敢言進此而有感格乎是時周方隆盛鳴鳳在郊卷阿鳴于高岡者乃詠其實故周公云爾也纂疏孔氏曰我往與汝奭其共濟渡成王○愚謂大無專責于我召公苟收斂退藏不勉王所不及以老成之德自居不降心以相從則治不克終我恐鳴鳳之祥不復聞矣況曰其有能如古人之格天格帝乎然此等句實聳牙難通惟挽留召公之意猶可認耳公曰嗚呼君

肆其監于茲我受命無疆惟休亦大惟艱告君乃猷

裕我不以後人迷肆大猷謀也茲指上文所言周公歎息欲召公大監視上文所陳也我文武受命固有無疆之美矣

然迹其積累締造蓋亦艱難之大者不可不相與竭力保守之也告君謀所以寬裕之道勿狹隘求去我不欲後人迷惑而失道也○呂氏曰大臣之位百責所萃震撼擊撞欲其鎮定辛甘燥濕欲其調濟繫錯結欲其解紆黷闇汚濁欲其茹納自非曠度洪量與夫患失乾沒者未嘗無翩然捨去之意况召公親



遭大變破斧斨之時屈折調護心勞力瘁又非平時大臣之比顧以成王未親政不敢乞身爾一旦政柄有歸浩然去志固人情之所必至然思文武王業之艱難念成王守成之無助則召公義未可去也今乃汲汲然求去之不暇其迫切已甚矣蓋謀所以寬裕之道圖功俟終長布四體為久大規模使君德開明未可捨去而聽纂疏呂氏曰我終不獨善而使後人迷惑周公自言所以後人之迷惑也纂疏不去者以勉召公也○愚謂不以後人迷如其君霸以其君顯之以留而明保啓迪成王是不以後人迷去而聽其迷惑是以後人迷也

命汝作汝民極曰汝明勗偶王在亶乘茲大命惟文

王德丕承無疆之恤偶配也蘇氏曰周公與召公同受武王顧命輔成王故周公言前人敷乃心腹以命汝召公位三公以為民極且曰汝當明勉輔孺子如耕之有耦也在于相信如車之有馭也并力一心以載天命念文考之舊德以丕承無疆之憂武王之言如此而可

纂疏孔氏曰汝明勉配王○張氏曰臣者君之偶如婦者夫之偶○陳氏曰乘載也猶負荷○愚按以命汝為武王顧命則茲大命竟指為武王之命為妥然蘇氏以汝明至之恤純為武王之言不若呂氏只以汝明勗偶王一句為武之言較勝然偶王亶乘等語實與澁不可解略認大意可也

公曰君告汝朕允保奭其汝克敬以予監于殷喪大

否肆念我天威大否大亂也告汝以我之誠呼其官而名之言汝能敬以我所言監視殷之喪亡大亂可不念我天威之可

乎畏予不允惟若茲誥予惟曰襄我二人汝有合哉言曰

在時二人天休滋至惟時二人弗戡其汝克敬德明

我俊民在讓後人于丕時戡勝也戡堪古通用周公言我不信于

我與汝而已汝聞我言而有合哉亦曰在是二人但天休茲至惟是我二人將不堪勝汝若以盈滿為懼則當能自敬德益加寅畏明揚俊民布列庶位以盡大臣之職業以答滋至之天休毋徒惴惴而欲去為也他日在汝  
推遜後人于大盛之時超然肥遯誰復汝禁今豈汝辭位之時乎纂疏陳氏今時未至盛大未有賢俊可讓召公未可去也大臣進退常以得人為慮有賢可以讓則身可以退蕭何且死必引曹參管仲不能薦賢所以不免于議也○愚謂我天威如召誥言我受天命大臣與國同體天命天威皆以我嗚呼篤負荷之不敢以不切已視之也讓字貫俊民字謂明俊民而讓之

嗟時二人我式克至于今日休我成成文王功于不

怠丕冒海隅出日罔不率俾周公復歎息言篤于輔君者是我二人我用能至于今日休盛然我

欲與召公共成文王功業于不怠大覆冒斯民使海隅日出之地無不臣服然後可也周都西土去東為遠故以日出言吳氏曰周公未嘗有其功以其留召公故言之蓋敘其所已然而勉  
纂疏蘇氏曰以我二人厚輔之故周室乃有其所未至亦人所悅而從者也



惟至于日月所照莫不率服乃已耳○陳氏大猷曰伐淮夷踐奄在此書後可見當時未能罔不率俾也右二章以文武留召公○愚謂告汝朕允與予不允惟若茲誥下文予不惠若茲多誥語皆相應告汝皆我允信之心也我豈不信而惟若此誥語乎我豈不相惠順而若此多誥乎未謂今日之休不可恃前人之功所當終必極天之所覆日之所照皆臣服然後文王之功方可以成言我與汝當同任其責而成之惟不倦可以成終召公殆未可去也前以商六臣周五臣四臣留之末以文武與身

**用閔于天越民**

周公言我不順於理而若茲誥復之多誥邪予惟用憂天命之不終及斯民之無賴也韓子言畏天命而悲人窮亦此意前言若茲誥故此言若茲多誥

周公之告召公其言語之際亦可悲矣

**公曰嗚呼君惟乃知民德亦罔不能厥初惟**

**其終祗若茲往敬用治**

上章言天命民心而民心又天命之本也故卒章專言民德以終之周公歎息謂召公踐歷諳練之久惟汝知民之德民德謂民心之嚮順亦罔不能其初今日固罔尤違矣當思其終則民之難保者尤可畏也其祗順此誥往敬用治不可忽也此召公已留周公飭遣就職之辭厥後召公既相成王又相康王再世猶未釋其政有味于周公之言也夫

**纂疏**

陳氏經曰借民情以喻民情每勤始而怠終此召公所知安可以此自處當惟其終可也語曰行百里者半九十言晚節末路之難也○張氏曰召公輔成王有初矣而求去不能終也○董氏鼎

氏曰古註其濟小子句通收罔易不及呂云召公若收斂退藏罔易勉成王之所不逮亦通張子曰若造德降則民誠和而鳳可致故鳴鳥聞所以為和氣之應也王氏炎曰文王之興鳳鳴岐山為周受命之符召公苟去固不能如五臣輔文王以聞鳴鳳之祥況能如伊陟臣扈之格天格帝乎

**公曰嗚呼君肆其監于茲我受命無疆惟休亦大惟艱告君**

**乃猷裕我不以後人迷**

肆大猷謀也茲指上文所言周公歎息欲召公大監視上文所陳也我文武受命固有無疆之美矣然迹其積累締造蓋亦艱難之大者不可不相與竭力保守之也告君謀所以寬裕之道勿狹隘欲去我不欲後人迷惑而失道也呂氏曰大臣之位百責所萃震撼擊撞欲其鎮定平甘燥濕欲其調齊繫錯欲其解紆賢闇汚濁欲其茹納自非曠度洪量與夫患失乾沒者未嘗無翮然捨去之意況召公親遭大變破斧缺斨之時屈折調護心勞力瘁又非平時大臣之比顧以成王未親政不敢乞身爾一旦政柄有歸浩然去志固人情之所必至然思文武王業之艱難念成王守成之無助則召公義未可去也今乃汲汲然求去之不暇其迫切已甚矣蓋謀所以寬裕之道圖功收終展布四體為久大規模使君德開明未可捨去

**纂註**

鄭氏曰召公不悅似隘急故令謀於寬裕○呂氏曰周公自言我終不獨善而使後人迷惑自言所以聽後人之迷惑也○陳氏曰不以後人迷謂欲使後人嗣前人恭明德不至於過佚前人光也○新安陳氏曰不以後人迷如其君霸以其君顯之以留而明保啓迪成王是不以後人迷也



作汝民極曰汝明勗偶王在亶乘茲大命惟文王德

丕承無疆之恤

偶配也蘇氏曰周公與召公同受武王顧命輔成王故周公言前人敷乃心腹以命汝召公位三公以為民極

且曰汝當明勉輔孺子如耕之有偶也在於相信如車之有馭也并力

孔氏曰文武布其乃心乃悉以命汝矣為汝民立中正矣汝明勉配王在於誠

信行此大命而已惟文王聖德為之子孫無忝厥祖大承無疆之憂○張氏曰

臣者君之偶如婦者夫之偶○陳氏曰乘載也猶負荷也○呂氏曰命作民極

置之具瞻以為民極也其命之辭則曰汝明明勉勵以偶配輔佐後王命之大

如此在今當宣誠以乘載此大命不可失墜今而遽去是墜此命非乘此命矣

又欲其追念文王眷遇之德為我周大受無窮之憂責洛誥周公之復留實以

文武之故今召公欲去周公復舉文武以感動之○新安陳氏曰以命汝為武

王顧命則茲大命竟指為武王之命為安然蘇以汝明至之恤純為武王之言

故以大命為天命也不若呂只以汝明勗偶王一句為武王之

言為優然此等偶王亶乘語實艱澁不可解略認大意可也

公曰君告

汝朕允保奭其汝克敬以予監于殷喪大否肆念我

天威

大否大亂也告汝以我之誠呼其官而名之言汝能敬以

我所言監視殷之喪世大亂可不念我天威之可畏乎

予不允惟

若茲誥予惟曰襄我二人汝有合哉言曰在時二人

是狡猾只是獸子○三叔之叛當時不便平息得模樣做出西晉初年時事想見武庚日夜去說誘三叔故管叔生起不肖之心如此○孔氏曰明王之法誅父用子言至公也叔之所封圻內之蔡仲之所封淮汝之間圻內之蔡名已滅故取其名以名新國欲其戒之○唐孔氏曰管在滎陽京縣東北不立管叔後者罪重故無子或有而不賢也杜預曰武王封叔度于汝南上蔡胡徙新蔡昭侯徙九江下蔡圻內蔡地不知所在不齒不得與兄弟年齒相次也閔元年晉滅霍故知復其舊封○夏氏曰古一里之地出車一乘謂以出車七乘地之賦奉之既囚之又是養之也○愚案以車七乘孔氏以屬上文蔡叔王氏以屬下文霍叔庸用也○張氏震曰象得罪于舜可貸之以恩管叔得罪于周不得不斷之以義霍叔不絕其身蔡叔不絕其子管叔獨不免誅絕恩與義並行不相悖也○林氏曰蔡叔有罪則囚之不以弟而私蔡仲賢則封之不以父而棄○葉氏曰舜殛鯀而與禹周公囚管蔡而封仲一也○魏氏了翁曰左定四年云蔡仲改行帥德周公舉之以為已卿士已字極好玩味蔡叔有罪而囚之子仲祇德則以為已卿士可見周公大聖人真與天地同其大也○蘇氏曰蔡叔未卒仲無君國之理崩殯在而輒立衛王若曰小子胡惟爾率德所以亂所以封仲必在叔卒之後也

改行克慎厥猷肆予命爾侯于東土往即乃封敬哉

胡仲名言仲循祖文王之德改父蔡叔之行能謹其道故我命汝為侯于東土往就汝所封之國其敬之哉呂氏曰敬哉者欲其無失此心也命書之辭雖稱成王實周公之意

爾尚蓋前人之愆惟忠惟孝爾乃邁迹自身



克勤無怠以垂憲乃後率乃祖文王之彛訓無若爾考之違王命

蔡叔之罪在于不忠不孝故仲能掩前人之愆者惟在于忠孝而已叔違王命仲無所因故曰邁迹自身克勤無怠所謂自身也垂憲乃後所謂邁迹也率乃祖文王之彛訓無若爾考之違王命上文所謂率德改行也

**纂疏**

呂氏曰子之新善著則父之舊愆庶

可掩蔡叔之惡既無以貽子孫仲乃始封之祖創業垂統之責萃焉蓋進其步武自我作古克勤無怠以垂法于後斯須之怠流弊或在數百年後不可不謹其原也○陳氏傳良曰舜命禹未嘗戒以鯀周公命微子未嘗及武庚今命仲而尤其父者于越人疏之于其兄戚之也父子兄弟間猶有諱而不盡言是愈疏矣周公于仲親親之道也有禹故鯀得以郊有安世延年故張湯杜周不列于酷吏蔡仲在人其謂叔曰幸哉有子如此歟故曰蓋前人之愆○愚謂子能改父之惡而為善則孝矣為子孝斯為臣忠故曰為忠臣于孝子之門是惟忠本于惟孝也克勤無怠以垂憲乃後即所謂邁迹自身

皇天無

親惟德是輔民心無常惟惠之懷為善不同同歸于治為惡不同同歸于亂爾其戒哉

**纂疏**

此章與伊尹申誥太甲之言相類而有深淺不同者愚謂此與伊尹之言語意正同未見

太甲蔡仲之有間也善固一端而無不可行之善惡亦一端而無可為之惡爾其可不戒之哉

慎厥初惟厥終終以不困不惟厥終終以困窮

惟思

也窮困之極也思其終者所以謹其初也

**纂疏**

呂氏曰語以謹始而即授以慮終竭兩端之教也○張氏曰感激多銳于初而怠于終

乃攸績睦乃四鄰以蕃王室以和兄弟康濟小民

所立之功親汝四鄰之國蕃屏王家和協同姓康濟小民五者諸侯職之所當盡也

章詳乃視聽罔以側言改厥度則予一人汝嘉

率循也無母同

詳審也中者心之理而無過不及之差者也舊章者先王之成法厥度者吾身之法度皆中之所出者作聰明則喜怒好惡皆出于私而非中矣其能不亂先王之舊章乎戒其本于己者然也側言一偏之言也視聽不審惑于一偏之說則非中矣其能不改吾身之法度乎戒其狃于己者然也仲能戒是則我一人汝嘉矣呂氏曰作聰明者非天之聰明特沾沾小智耳作與不作而天判焉

**纂疏**

陳氏經曰舊章法度皆中之所寓舊章已然之制法度當然之制皆中也公慮仲懲創父愆用意過當反復生事為奇故戒之○夏氏曰率皆也自從也凡事皆從中道也○呂氏曰舊章往往不與新進喜事者合故作聰明者尤欲亂之聽覽不貴于速而貴于詳見事風生迎刃立決宜若可喜然忽略踈快動皆愆尤讒說姦言每乘其忽遽而入之惟詳其視聽安徐審訂表裏畢陳側媚之言將不得售故詳者聽覽之大法也規矩準度未至于樂循理者則常若為之繫維側言乃解其繫維而縱之放逸之場者故從之也輕仲以英妙之年任國事周公老成深慮故戒之如此○陳氏大猷曰舊章常度則中道所存內不變于己之私智外不變于人之私言則中道合而侯職盡矣

王



曰嗚呼小子胡汝往哉無荒弃朕命

飭往就國戒其母廢弃我命汝所言也

**多方**

成王即政奄與淮夷又叛成王滅奄歸作此篇案費誓言徐戎淮夷四方容或有之故及多方亦誥體也今古文皆有○蘇氏曰大誥康誥酒誥梓材召誥洛誥多士多方八篇雖所誥不一然大略以殷人心不服周而作也予讀泰誓武成常怪周取殷之易及讀此八篇又怪周安殷之難也多方所告不止殷人乃及四方之士是紛紛焉不心服者非獨殷人也予乃今知湯已下七王之德深矣方殷之虐人如在膏火中歸周如流不暇念先王之德及天下粗定人自膏火中出即念殷先王如父母雖以武王周公之聖相繼撫之而莫能禦也夫以西漢道德比之殷猶砥礪之與美玉然王莽公孫述隗囂之流終不能使人忘漢光武成功若建瓴然使周無周公則亦殆矣此周公之所以畏而不敢去也

**纂疏**

林氏曰奄即淮夷之一種總言曰淮夷如春秋赤狄之有潞氏甲氏也周公攝政時奄嘗與三監叛多士曰昔朕來自奄嘗征之今成王即政奄又叛王滅之而歸錫諸侯來朝公又稱王命以告之而作此篇○吳氏曰自大誥至多方其處殷人何其難也武王崩以喜亂之徒因思舊之情乘內難之際三者參合其禍至此固周之不造實天之大扶持保佑有周者也譬人稚齒百疾先見則必過加調護凡伐性傷生者一切不敢萌所以培固真源克登上壽少年多疾之力也成周八百年之業可于此占之

多士多方意相出入多士既遷殷民而獨告之也故視多方為略多方既踐奄而徧告庶邦也故視多士為詳

惟五月丁亥王來自奄至于宗周

成王即政之明年商奄又叛成王征滅之杜預云奄

不知所在宗周鎬京也呂氏曰王者定都天下之所宗也東遷之後定都于洛則洛亦謂之宗周衛孔悝之鼎銘曰隨難于漢陽即宮于宗周是時錫已封秦宗周蓋指洛也然則宗周初無定名隨王者所都而名耳

**纂疏**

愚案洛誥戊辰王在新邑孔註十二月戊辰晦此七年之十二月也多士作于是年三月曰昔朕來自奄是述東征時事乃自武王誅紂伐奄後又叛也多士作于王即政之明年五月成王政序曰成王遂踐奄多方序曰王歸自奄書曰王來自奄乃東征伐奄後奄又叛也王墮其地遷其君絕其本根又因以告多方也

以去年十二月戊辰晦等之則次年正月朔己巳五月朔非丁卯則戊辰丁亥非二十日即二十一日也多士與多方之作先後蓋一年有三月云

周公曰王若曰猷告爾四國

多方惟爾殷侯尹民我惟大降爾命爾罔不知

公曰而復曰王若曰何也明周公傳王命而非周公之命也周公之命誥終于此篇故發例于此以見大誥諸篇凡稱王曰者無非周公傳成王之命也成王滅奄之後告諭四國殷民而因以曉天下也所主殷民故又專提殷侯之正民者告之言殷民罪應誅戮我大降爾命爾宜無不知也

**纂疏**

愚案

洪惟



圖天之命弗永寅念于祀

圖謀也言商奄大惟私意圖謀天命自底滅亡不深長敬念以保其祭祀呂氏曰天命可受而不可圖圖則人謀之私而非天命之公矣此蓋深示以天命不可妄干乃多方一篇之綱領也下文引夏商所以失天命受天命者以明示之

惟帝降格于夏有夏誕厥逸不肯感言于民乃大淫

昏不克終日勸于帝之迪乃爾攸聞

言帝降災異以譴告桀桀不知戒懼乃大肆逸

豫憂民之言尚不肯出諸口況望其有憂民之實乎勸勉也迪啓迪也視聽動息日用之間洋洋乎皆上帝所以啓迪開導斯人者桀乃大肆淫昏終日之間不能少勉于是天理或幾乎息矣況望有惠迪而不違乎此乃爾之所聞欲其因桀而知紂也厥逸與多士引逸不同者猶亂之為亂為治耳逸豫以民言淫昏以帝言各以其義

**纂疏**

孔氏曰惟天下至戒于夏以譴告之謂災異也此章上疑有缺文王氏曰帝降格于夏與多士則惟帝降格嚮

于時夏厥圖帝之命不克開于民之麗乃大降罰崇亂

有夏因甲于內亂不克靈承于旅罔丕惟進之恭洪

舒于民亦惟有夏之民叨憤日欽劓割夏邑

此章文多未詳麗猶

日月麗乎天之麗謂民之所依以生者也依于土依于衣食之類甲始也言桀矯誣上天圖度帝命不能開民衣食之原于民依恃以生者一皆抑塞遏絕之

猶乃大降威虐于民以增亂其國其所因則始于內嬖蠱其心敗其家不能善承其衆不能大進于恭而大寬裕其民亦惟夏邑之民貪叨忿憤者則日欽崇而專用之以戕害于其國也

**纂疏**

孔氏曰麗音黎施也不能開于民之所施政教○蘇氏曰麗著直略反也奠民之居王政之本民不土著難使

桀不開衣食之源以定民居也○葉氏曰麗附於罪法也古者治獄以附罪為麗故秋官稱各麗其法以議獄訟開明也不能明于民之附法者而大降之罰○愚案開于民之麗衆說惟葉氏的當既與乃大降罰相貫又與下文慎厥麗乃勸教民刑用勸等語皆相應○呂氏曰原其所因蓋始于內亂未喜之嬖是也蠱其心敗其家然後流毒于國與天下探其根而言之也

命于成湯刑殄有夏

言天惟是為民求主耳桀既不能為民之主天乃大降顯休命于成湯使為民主而伐夏殄滅

之也○呂氏曰曰求曰降豈真有求之降之者哉天下無統渙散漫流勢不得不歸其所聚而湯之一德乃所謂顯休命之實一眾離而聚之者也民不得不聚于湯湯不得不受斯民之聚是豈人為之私哉故曰天求之天降之也

惟天不畀純乃惟以爾多方

之義民不克永于多享惟夏之恭多士大不克明保

純大也義民賢者也

享于民乃胥惟虐于民至于百為大不克開

言天不與桀者大乃以爾多方賢者不克永于多享以至于亡也言桀于義民不能用其所敬之多士率皆不義之民上文所謂叨憤日欽者同惡相濟大不



能明保享于民乃相與播虐于民民無所措其手足凡百所為無一能達上文所謂不克開于民之麗者政暴民窮所以速其亡也此雖指桀多士爾殷侯尹民嘗逮事紂者寧

**纂疏** 林氏曰此篇陳桀紂之亡商周之興皆出于天不惕然內愧乎其所奪非人力所能支天之所予非人力所能移其所以予奪者在德與不德耳多方當知天命不可有他志也○呂氏曰義民知義之民也桀之時三宅無義民義民在下雖多何補以爾多方之義民不能永受衆多之服享如負米而飢載泉而渴蓋哀之也百為大不克

開欲耕害其耕欲買害其買四向皆窮無一能達民窮如此也  
**乃惟成湯克以爾多方簡代夏作民主** 簡擇也擇而歸之  
**慎厥麗乃勸厥民刑用勸** 湯深謹其所依以勸勉其民故民皆儀刑而用勸勉也人君之于天下仁而已矣仁者君之所依也君仁則莫不仁矣

以至于帝乙罔不明德慎罰亦克用勸 明德則民愛慕之謹罰則民畏服之  
**要囚** 自咸湯至于帝乙雖歷世不同而皆知明其德謹其罰故亦能用以勸勉其民也明德謹罰所以謹厥麗也明德仁之本也謹罰仁之政也

**殄戮多罪亦克用勸開釋無辜亦克用勸** 德明之而已罰有辟焉有宥焉故再言辟而當罪亦能用以勸勉宥而赦過亦能用以勸勉言辟與宥皆足以使人勉於善也  
**今至于爾辟弗克以**

**爾多方享天之命** 呂氏曰爾辟謂紂也商先哲王世傳家法積累維持如此今一旦至于汝君乃以爾全盛之多方不

克坐享天命而亡之是誠可閔也天命至公操則存舍則亡以商先王之多基圖之大紂曾不得席其餘蔭其亡忽焉危微操舍之幾周公所以示天下深矣豈徒曰慰解

**纂疏** 葉氏曰簡如簡在帝心之簡○呂氏曰赦而民勸可也刑之而已哉 而民亦勸則有默行于刑赦之間矣每語結以勸者天下非可驅以智力束以法制惟動化于民使常有欣欣不自己之意乃維持長久之道也○陳氏經曰商之家法在明德慎罰明德化民用德其本心慎罰不濫及民刑不得已也本原既正則或刑或宥皆足以勸民于善刑一也先王用之而使民勸後世用之而為民毒何也先王之刑皆仁之寓後世之刑不仁之具也夫子未嘗不鈞也而仁見于不綱不射宿之際文王非不蒐田也而仁見于一發不再舉之時○愚案前後章兩麗字皆當作附麗刑法說慎厥麗謹其刑法之附麗也乃勸乃以勸民也所以其民受刑刑當其罪故亦用以勸也由明德以慎罰所以亦能用勸戮之釋之刑所當刑宥所當宥無不能用勸也慎厥麗與上文開于民之麗二麗字相照應一乃勸字生下文

**鳴呼王若曰** 四勸字說上刑罰來皆相照應以附麗于法解麗字不可易矣

**誥告爾多方非天庸釋有夏非天庸釋有殷** 先言鳴呼而後言王若曰者唐

孔氏曰周公先自歎息而後稱王命以告之也庸用也有心之謂釋去之也上文言夏殷之亡因言非天有心于去夏亦非天有心于去殷下文遂言乃惟桀紂自取亡滅也○呂氏曰周公先自歎息而始宣布成王之誥告以見周公未嘗稱王也又此篇之始周公曰王若曰復語相承書無此體也至于此章先鳴呼而後王若曰書亦無此體也周公居聖人之變史官豫憂來世傳疑襲誤蓋有竊之為口實矣故于周公誥命終篇發新例二著周公實未嘗稱王所以別嫌明



微而謹萬世之防也乃惟爾辟以爾多方大淫圖天之命屑有辭

紂以多方之富大肆淫泆圖度天命瑣屑有辭與多士言桀大淫泆有辭義同殷之亡非自取乎以下二章推之此章之上當有缺文

夏圖厥政不集于享天降時喪有邦間之乃惟爾商後王逸厥逸圖厥政

不集于享而集于亡故天降是喪亂乃惟爾商後王逸厥逸圖厥政

不蠲烝天惟降時喪蠲烝進也紂以逸居逸淫酒無度故其為政不蠲烝而穢惡不烝進而怠惰天以是降喪亡

于殷殷之亡非自取乎此上三節皆應上文非天庸釋之語

不集于享也桀不集于享而集于亡唐孔氏曰湯本夏諸侯故曰有邦陳

氏曰過逸其安逸猶言安其危林氏曰逸厥逸甚言其逸也猶言醉乎醉

孔氏曰不潔進于善毅齋沈氏曰不蠲烝不蠲潔以烝祭也如葛伯不祀紂

昏棄肆祀是也愚惟聖罔念作狂惟狂克念作聖天惟五年須暇之子孫誕作民主罔可念聽

則為聖矣紂雖昏愚亦有可改過遷善之理故天又未忍遽絕之猶五年之久須待暇寬于紂觀其克念大為民主而紂無可念可聽者五年必有指實而言

求爾多方大動以威開厥顧天惟爾多方罔堪顧之

紂既罔可念聽天于是求民主于爾多方大警動以祿祥譴告之威以惟我

開發其能受眷顧之命者而爾多方之眾皆不足以堪眷顧之命也

孔氏牽合歲月者非是或曰狂而克念果可為聖乎曰聖固未易為也狂而克念則作聖之功知所向方太甲其庶幾矣聖而罔念果至于狂乎曰聖固無所謂罔念也禹戒舜曰無若丹朱傲惟慢遊是好一念之差雖未至于狂而狂之理亦在是矣此人心惟危聖人拳拳告戒豈無意哉

字只看易曉處如惟聖至作聖不與上下文相似下文便不可曉只看這兩句

○問惟上智與下愚不移書中謂惟聖罔念至克念作聖如此則又有移得者

曰如狂作聖則有之既聖人決不到作狂此只是甚言不可不學○陳氏經

曰孔子不移之言聖狂之成也其習既成則不移矣書之言聖狂之分也聖狂

分于一念之頃堯舜而忘兢業豈不趨于狂桀紂而能改過豈不趨于聖孔子

雖曰不移實有可移之理但恐下愚自暴自棄不肯移耳肯移之是狂之克念

也公言此明紂之惡儻一旦改悔天必不終棄之○呂氏曰紂固無能改之事

而有可改之理罔念克念之機所謂可改之理也聖通明之稱周官六德聖居

其一非大而化之之聖也若大而化之寧有罔念又豈狂者一克念而遽可至

哉然大而化之亦通明之極而至于化耳狂而克念亦大而化之之基也雖曰

通明不念則狂雖曰狂惑克念則通其機惟在念不念之間耳紂雖狂惑使其

克念作聖孰禦惟其有可改之理天故以商先王之故徘徊五年須待寬暇之

依依于商王子孫而冀其改焉○孔氏曰武王服喪三年遷師二年○天惟



周王靈承于旅克堪用德惟典神天天惟式教我用

休簡畀殷命尹爾多方

典主式用也克堪者能勝之謂也德輜如毛民鮮克舉之言德舉者莫能勝也文武

善承其眾克堪用德是誠可以為神天之主矣故天式教文武用以休美簡擇異什殷命以正爾多方也呂氏曰式教用休者如之何而教之也文武既得乎天天德日新左右逢原其思也若或起之其行也若或翼之乃天之所以教而用以昌大休明者非諄諄然而教之也此章深論天下向者天命未定眷求民主之時能者則得之孰有遏汝者乃無一能當天之眷今天既命我周而定于一矣爾猶洵洵不靖欲何為邪明指天命而警服四海英雄之心者莫切于是

**纂疏**

呂氏曰前論夏之亡本于不克靈承于旅此論周之興亦曰靈承于旅文武于德能勝而用之其力過孟賁遠矣漢唐賢主豈無欲布德者惟力薄而奪于欲故駁而不純是知德非真有力大力量莫能勝而用之也

曷敢多誥我惟大降爾四國民命

言今我何敢如此多誥我惟大降爾四國民命舉

其有宥過之恩而責其遷善之實也

爾曷不忱裕之于爾多方爾曷不夾介

乂我周王享天之命今爾尚宅爾宅畋爾田爾曷不

惠王熙天之命

夾夾輔之夾介賓介之介爾何不誠信寬裕于爾之多方乎爾何不夾輔介助我周王享天之命乎爾之叛亂

據法定罪則猶其宅收其田可也今爾猶得居爾宅耕爾田爾何不順我王室各守爾典以廣天命乎此三節責其何不如此也

爾乃迪

屢不靜爾心未愛爾乃不大宅天命爾乃屑播天命

爾乃自作不典圖忱于正

爾乃屢蹈不靜自取亡滅爾心其未知所以自愛邪爾乃大不安天命邪爾乃

輕棄天命邪爾乃自為不法欲圖見信于正者以為當然邪此四節責其不可如此也

我惟時其教告之我惟

時其戰要囚之至于再至于三乃有不用我降爾命

我乃其大罰殛之非我有周秉德不康寧乃惟爾自

速辜

我惟是教告而誨諭之我惟是戒懼而要囚之今至于再至于三矣爾不用我降爾命而猶徂于叛亂反覆我乃其大罰殛殺之非我有周

持德不安靜乃惟爾自為凶逆以速其罪耳

**纂疏**

呂氏曰教以誠信寬裕惟謹故追惟誠故裕也陳氏大猷曰我周王如用又厥辟之又謂治其君之事自作亂常苟欲人信以為正蓋自以為正義也告教如大誥多士之訓

戰要囚如東征踐奄之師○王氏曰迪汝屢矣而猶不靜○孔氏曰教告之謂訊之以文誥戰要囚謂誅其禍亂執其朋黨再謂三監淮夷叛三謂王即政又叛言迪屢不靜之事○唐孔氏曰至于再三蓋指誅紂伐奄為一



曰嗚呼猷告爾有方多士暨殷多士今爾奔走臣我

監五祀

監監洛邑之遷民者也猶諸侯之分民有君道焉所以謂之臣我監也言商士遷洛奔走臣服我監于今五年矣不曰年而曰祀者因商俗而言也又案成周既成而成王即政成王即政而商奄繼叛事皆相因纒一二年耳今言五祀則商民之遷固在作洛之前矣尤為明驗

惟有胥伯小大多正爾罔不克臬

臬事也周官多以胥以伯以正為名胥伯小大眾多之正蓋殷多士授職于洛共長治遷民者也其奔走臣我監亦久矣宜相體悉竭力其職無或反側偷惰而不能事也

惟和哉爾室不睦爾惟和哉爾邑克明爾惟克勤乃

事

心不安靜則身不順矣身不安靜則家不和順矣言爾惟和哉者所以勸勉之也和其身睦其家而後能協于其邑雖然有恩以相愛然有文以相接爾邑克明始為不負其職而可謂克勤乃事矣前既戒以罔不克臬故以克勤乃事期之也

亦則以穆穆在乃位克閱于乃邑謀介

忌畏也穆穆和敬貌頑民誠可畏矣然如上文所言爾多士庶幾不至畏忌頑民凶德亦則以穆穆和敬端處爾位以潛消其悻逆悻戾之氣又能簡閱爾邑之賢者以謀其助則民之頑者且革而化矣尚何可畏之有哉成王誘掖商士之善

爾乃自時洛邑尚永

力畋爾田天惟畀矜爾我有周惟其大介賚爾迪簡  
在王庭尚爾事有服在大僚

爾我有周亦將大介助賚錫于爾啓迪簡拔置之王朝矣其庶幾勉爾之事有服在大僚不難至也多士篇商民常以夏迪簡在王庭有服在百僚為言故此因以勸

寡

寡案康誥臬司臬事皆訓為寡此亦當然此章專提起胥

厲之也

爾邑之教化能修明爾方為能勤乃事矣又告以和之道爾庶幾寬綽其心

不忌嫉凶德者亦則以和敬居爾位蓋服凶人莫如和敬也又能簡閱爾邑求賢以謀自介助和敬盡于己而介助賢于人庶凶德化而人和洽矣爾果能此庶幾自此洛邑長保田祿豈惟此哉天亦惟畀矜爾豈惟天哉我周亦大介助

賚錫爾介如佑賢輔德賚如錫之士田且將自此洛邑之胥伯正而迪簡在王

朝矣又有尊尚爾職事者且將有事而升在大僚矣此即所謂大介賚也蓋遷

殷民就拔其豪俊為胥伯正以共長治之乃用其素所服習者此安集新民之

要道故今特勸勵之使表率殷士殷民而躋于泰和也○呂氏曰多士序商民

之怨周曰夏迪云云則以大義裁之此乃迪簡云云為勸何也爵位上之所命

非下之可干怨望而許之姑息之政也示以好惡而勸之磨厲之具也此周公



則惟爾多方探天之威我則致天之罰離逃爾土

將終乃歎息言爾多士如不能相勸信我之誥命爾亦則惟不能享上凡爾之民亦惟曰上不必享矣爾乃放逸頗僻大違我命則惟爾多士自取天威我亦致天之罰播流蕩析俾爾離遠爾土矣爾雖欲宅爾宅畋爾田尚可得哉多方疑當作多士上章既勸之以休此章則董之以威商民不惟有所慕而不敢違越且有所畏而不敢違越矣

**稟**疏 王曰我上告以承之庸之此告以成之也 王曰我不惟多誥我惟

**稟**疏 陳氏經曰我敬告爾以天命也 不知天命乃商民之

**稟**疏 病根故此篇言天命九詳 又曰時惟爾初不克敬于和則無我

**稟**疏 怨與之更始故曰時惟爾初也爾民至此苟又不能敬于和猶復乖亂則自底誅戮毋我怨尤矣開其為善禁其為惡周家忠厚之意于是篇尤為可見

**稟**疏 呂氏曰又曰二字所以形容周公之惓惓斯民命已畢而猶有餘情誥已終而猶有餘語顧盼之光猶曄然溢于簡冊也

**稟**疏 呂氏曰更端為善之一初也蓋殷民與紂同惡武王克紂是惟新之一初也不能而從三監叛既失此初矣遷洛又一初也復不能而屢迪不靜又失此初矣今歸自踐奄反覆丁寧之前之過一皆洗滌今之善當相與圖新豈非又一初乎若又失此初不能敬以納民于和則永無可望矣但曰則無我怨而自取誅戮之意隱然于不言之表周家忠厚何其至哉

**稟**疏 家忠厚何其至哉

**立政** 吳氏曰此書戒成王以任用賢才之道而其旨意則又上戒成王專擇百官有司之長如所謂常伯常任準人等云

者蓋古者外之諸侯一卿已命于君內之卿大夫則亦自擇其屬如周公以蔡仲為卿士伯冏謹簡乃僚之類其長既賢則其所舉用無不賢者矣葛氏曰

**稟**疏 呂氏曰無逸立政二篇相為經緯以無逸之心明立政之體君道備矣自立政後周公不復有書納忠于王此絕筆也為治體統固臻其極而反復申重之意忠愛博篤之誠深長遠大之慮學者當於言外體之

○愚謂此篇以用三宅為立政用人之綱領立政二字每段多提掇之故以名篇孟子曰人不足與適也政不足與間也惟大人為能格君心之非無逸周公格心之書也立政公言用人為政之書也忠愛拳拳體用備矣

周公若曰拜手稽首告嗣天子王矣用咸戒于王曰

王左右常伯常任準人綴衣虎賁周公曰嗚呼休茲

知恤鮮哉 此篇周公所作而記之者周史也故稱若曰言周公帥羣臣進戒于王贊之曰拜手稽首告嗣天子王矣羣臣用皆進戒曰王

左右之臣有牧民之長曰常伯有任事之公卿曰常任有守法之有司曰準人三事之外掌服器者曰綴衣執射御者曰虎賁皆任用之所當謹者周公于是歎息言曰美矣此官然知憂恤者鮮矣言五等官職之美而知憂其得人者少也吳氏曰綴衣虎賁近臣之長也葛氏曰綴衣周禮司服之類虎賁周禮之虎



賈氏也。言如召誥拜手稽首旅王若公亦是召公自言與此同也。○陳氏大猷曰：嗣天子今臨政王天下矣，非前幼冲比故警之如此，用悉意以告王。○林氏曰：下文宅乃事，即常任宅乃牧，即常伯宅乃準，即準人此以為伯下以為牧，以伯為牧民之長也。在左右者以牧伯兼公卿也。三宅固貴得人，然進見有時，虎賁綴衣之類，則朝夕親密，苟非其人，則主德內蔽，大臣雖賢，何所施其力哉。○呂氏曰：常伯等即三宅，三代之書他無所見，意者公卿輔相之別名歟。官有別名如相曰阿衡，三卿曰圻父、農父、宏父，此亦三代輔政大臣別名耳。綴衣虎賁，特干侍御，僕從中錯舉二者，以見其餘職重者有安危之寄，職親者有染習之移，其繫天下之本一也。必先知建官之美，意然後能深憂而審擇之。三宅左右大臣綴衣虎賁，左右小臣職有大小而經綸康濟，熏陶涵養，賴焉知其美而加之憂庶不以非人處之。○愚案：常伯等孔氏蘇氏分三公六卿有司，但宜以分配三宅而皆為大臣若謂三公則公論道他事不當及之，若謂六卿則準別名呂說得之，常任即宅事所職必廣，凡任事之大臣也。常伯即宅牧主牧養之大臣也。準人即宅準主平法之大臣也。何公卿有司之分哉。又案：虞有十二牧，夏周有九牧，皆在邦國，意必有大臣在朝者以統之，如虞四岳統諸侯，周六卿倡九牧立政之常，伯宅牧必掌牧養而在朝以統牧伯者歟。又案：成戒傳謂公辛羣臣終篇不見羣臣進戒意，以後章成告孺子王矣。証之成只訓皆公皆以告戒王耳。成戒成告無二義也。陳氏經曰：成戒者周公盡舉以告王，無有不盡之意。○古之人迪惟有夏，乃有室大競，顛俊尊上帝迪知。

忱恂于九德之行，乃敢告教厥后，曰：拜手稽首，后矣。曰：宅乃事，宅乃牧，宅乃準，兹惟后矣。謀面用丕訓德，則乃宅人。兹乃三宅無義民。

古之人有行此道者，惟有夏之君當王室大強之時，而求賢以為事。

天之實也。迪，知者。蹈知而非苟知也。忱，恂者。誠信而非輕信也。言夏之臣蹈知誠信于九德之行，乃敢告教其君曰：拜手稽首，后矣。云者，致敬以尊其為君之名也。曰宅乃事，宅乃牧，宅乃準，兹惟后矣。云者，致告以敘其為君之實也。兹者，此也。言如此而後可以為君也。猶臯陶與禹言九德之事，謀面者，謀人之面貌也。言非迪知忱恂于九德之行而徒謀之面貌，用以為大順于德乃宅而任之。如此則三宅之人豈復有賢者乎。蘇氏曰：事則向所謂常任也。牧則向所謂常伯也。準則向所謂準人。也。一篇之中，所論宅俊者參差不齊，然大要不出是三者。其餘則皆小臣百執事也。吳氏曰：古者凡以善言語人皆謂之教，不必自教下而後謂之教也。

**桀德惟乃弗作，往任是惟暴德罔後。**

夏桀惡德弗作，往昔先王任用

**纂疏** 三宅無義民，此三宅即宅事宅牧宅準之宅。孔氏蘇氏以為居無義之民，猶舜典之五宅。三居呂氏以三宅無義民一句，接下句桀德惟乃弗作，往任謂當桀之時，居三宅者曾無義民二說。孰長先生曰：呂說是。○林氏曰：惟禹以顛俊為心，故其臣亦以薦揚為務。○呂氏曰：統名曰俊，所以為俊者，則有九德之別，不能實知薦信于九德之行，雖號召賢俊，猶無益也。自臯陶以九德告禹，夏后蓋世守以為



知人之法夏之臣既以宅三宅告其君于是謀以博詢之面以親驗之用其大  
順于德者必如是乃謂能宅人蓋大任不可輕付大德不可小知必參人已然  
後盡也○陳氏大猷曰宅者居而安之之謂或才德不稱或委任不篤皆非宅  
也○愚謂公既嘆知恤者鮮復歷舉古之知恤者以告王夏后商湯文武皆知  
恤此者以次言之也無競維人中之俊乃天生之以遺國家者九德之行即  
臯謨之行有九德自寬粟至強義之德之見于躬行者也俊非徒才俊必有德  
如所謂以克俊有德臯陶亦曰九德成事俊又在官未嘗岐俊與德而二之宅  
乃事用大臣以宅君之事也下倣此此章呂說大槩得之弗作往往任盡疑方  
夏之盛任三宅者如此之音及其義也遂至于曾無義民言皆不義之人無一  
君子也茲乃云者此乃三宅之位非他位也猶無義民則他可知矣然非人才  
果異往日也桀之惡德弗作往日之任用而已往惟俊德是任效見  
于有室大競桀惟昏德是任效見于絕世無後信乎存亡在所任也 **亦越成**

**湯陟不釐上帝之耿命乃用三有宅克即宅曰三有**

**俊克即俊嚴惟丕式克用三宅三俊其在商邑用協**

**于厥邑其在四方用丕式見德**亦越者繼前之辭也耿光也湯自七十里升為天子典禮命討

昭著于天下所謂陟不釐上帝之光命也三宅謂居常伯常任準人之位者三俊謂有常伯常任準人之才者克即者言湯所用三宅實能就是位而不曠其職所稱三俊實能就是德而不浮其名也三俊說者謂他日次補三宅者詳宅以位言俊以德言意其儲養待用或如說者所云也惟思式法也湯於三宅三

俊嚴思而丕法之故能盡其宅俊之用而宅者得以效其職俊者得以著其才賢智奮庸登于至治其在商邑用協于厥邑近者察之詳其情未易齊畿甸之協則純之至也其在四方用丕式見德遠者及之難其德未易徧觀法之同則大之至也至純至大治道無餘蘊矣曰邑曰四方者各極其遠近而言耳

**纂疏**呂氏曰漢高儲參陵平勃于身後迄定再世之亂孔明儲琬禕允等于身後亦維持數十年況三代為天下長慮固宜儲三俊以繼三宅也嚴

事賢者惟大則效之然後能用宅俊所謂學于伊尹而後臣之亦一証也宅俊未用知之者惟湯既用之後夫人而信之或曰用湯之丕式乎賢而見湯之德○愚謂大理上帝之明命即天命有德之命下文用宅俊是也宅俊用而遠近半蓋舉用當而人心服好人所好不拂人之性故也嚴惟丕式君大法乎賢也用丕式見德下之人因之大法乎賢者可見之德也湯用三宅且儲三俊以供無窮之用上廣夏后之所未及而下為文武之所取法焉 **嗚呼其在受德賢惟羞刑暴德之人同于厥邦乃惟庶習逸**

**德之人同于厥政帝欽罰之乃侔我有夏式商受命**

**奄旬萬姓**羞刑進任刑戮者也庶習備諸眾醜者也言紂德強暴又所與共國者惟羞刑暴德之諸侯所與共政者惟庶習逸德之臣下

上帝敬致其罰乃使我周有此諸夏用商所受之命而奄旬萬姓焉旬者并牧其地什伍其民也 **纂疏** 愚謂羞刑欽罰疑有訛誤 **亦越**

**文王武王克知三有宅心灼見三有俊心以敬事上**



帝立民長伯

三宅三俊文武克灼見皆曰心者即所謂迪知忱恂而灼見以是敬事上帝則天職修而上有所承以是立民長伯則體統立而下有所寄人君位天人之兩間而俯仰無作者是也夏之尊帝商之尊帝周之敬事其義一也長如王制所謂五國以為屬屬有長

纂疏

呂氏曰論湯文武伯如王制所謂二百一十國以為州州有伯是也

上文相參也祭之時若不可為矣亦於湯而遠如是焉紂宅時若不可為矣亦於文武而遠如是焉治亂同機而異發聖狂同心而異念明亦同世而異用人君蓋于此深省乎知宅俊皆曰心者君臣相與萬化之原苟親親口惠相期于肝膽之外則無其本矣○愚謂立民長伯當時宅俊或有出而封為長伯者歟諸侯入為王官王官出為諸侯古常有之

立政任人準夫牧作三事

言文武立政三宅之官也任人常任

也準夫準人也牧常伯也以職言故曰事

虎賁綴衣趣馬小尹左右攜僕百司庶

府

此侍御之官也趣馬掌馬之官小尹小官之長攜僕攜持僕御之人百司若司表司服庶府若內府大府之屬是也

大都小伯

藝人表臣百司太史尹伯庶常吉士

此都邑之官也呂氏曰大都小伯者謂大都之

伯小都之伯也大都言都不言伯小伯言伯不言都互見之也藝人者卜祝巫匠執技以事上者表臣百司表外也表對裏之辭上文百司蓋內百司若內府內司服之屬所謂裏臣也此百司蓋外百司若外府外司服之屬所謂表臣也太史者史官也尹伯者有司之長如庖人內饗膳夫則是數尹之伯也鍾師尹

鍾磬師尹磬太師司禁則是數尹之伯也凡所謂官吏莫不在內外百司之中至于特見其名者則皆有意焉虎賁綴衣趣馬小尹左右攜僕以扈衛親近而見庶府以冗賤人所易忽而見藝人恐其或與淫巧機詐以蕩上心而見太史以奉諱惡公天下後世之是非而見尹伯以大小相維體統所係而見若大都小伯則分治郊畿不預百司之數者既條陳歷數文武之眾職而總結之曰庶常吉士庶眾也言在文武之廷無非常德吉士也

司徒司

馬司空亞旅

此諸侯之官也司徒主邦教司馬主邦政司空主邦土餘見牧誓言諸侯之官莫不得人也諸侯之官獨舉此者以

其名位通于天子歟

夷微盧烝三亳阪尹

此王官之監于諸侯四夷者也微盧南亳偃師為西亳烝或以為眾或以為夷名阪未詳古者險危之地封疆之守或不以封而使王官治之參錯于五服之間是之謂尹地志載王官所治非一

此特舉其重者耳自諸侯三卿以降惟列官名而無他語承上庶常吉士之文以內見外也夫上自王朝內而都邑外而諸侯遠而夷狄莫不皆得入以為官使何其繁疏亞旅謂三官之副與其屬耳亞謂小司徒之類旅即下士也○盛歟董氏曰周官注大都公之采邑小都卿之采地是也古人立言之法有互文見意者如詩鉦人伐鼓之類○王氏曰此篇屢言三宅而先後之序不同者官使之際皆當致謹初無一定之先後也○陳氏曰伯舉其長亞旅舉其屬互相備也以上詳言文武用人凡大小內外遠近皆各得其人也君子用心常久則為吉士小用人則為凶人彰厥有常吉哉亦此意夷微盧烝四國也三亳商故地分而為三也如後世三楚三吳阪險之地皆立官以長之故曰尹言四國三亳與阪險之地皆有尹也文武以一人之聰明豈能周知

鍾磬師尹磬太師司禁則是數尹之伯也凡所謂官吏莫不在內外百司之中至于特見其名者則皆有意焉虎賁綴衣趣馬小尹左右攜僕以扈衛親近而見庶府以冗賤人所易忽而見藝人恐其或與淫巧機詐以蕩上心而見太史以奉諱惡公天下後世之是非而見尹伯以大小相維體統所係而見若大都小伯則分治郊畿不預百司之數者既條陳歷數文武之眾職而總結之曰庶常吉士庶眾也言在文武之廷無非常德吉士也



內外遠近小大之臣哉三宅大臣人主所親擇其下小大之臣又各委之三宅高宗曰惟暨乃僚穆王亦曰慎簡乃僚皆然也○愚謂文武立政之本在用任人準夫牧三宅以作三宅之職事而已百司庶府以上此內百司所謂裏臣也表臣百司以下此外百司所謂表臣也以下之表臣見上為裏臣也文武時得人之盛如此推其本原由其知立政綱領在用三宅三宅得人故內外眾職皆得人也下文遂復以三宅參錯言之

**宅心乃克立茲常事司牧人以克俊有德**文王惟能其三宅之心能者能

之也知之至信之篤之謂故能立此常任常伯用能俊有德也不言

準人者因上章言文王用人而申克知三有宅心之說故略之也

惟克厥宅心人皆以宅心為處心非也即前面所說三有宅心耳若處心則云

克宅厥心○孔氏曰文王惟其能居心○呂氏曰此又極本原以示之心者萬

事之綱也君心既安則經世事業皆此心之建立舉世人才皆此心之感應也

文王之官繁矣曷嘗求之外哉惟能宅心而已○真氏曰不曰克宅厥心而曰

克厥宅心猶卑謨不曰慎修厥身而曰慎厥身修也○愚謂以宅心為三宅之

心與上文克知三有宅心合為一說免添出文王自宅心一語豈不甚好然蔡

氏所謂能其三宅之心欠順克字下或脫一知字或知

字誤作厥字則可不知仍孔注為妥真氏之証極當

**庶言庶獄庶慎惟有司之牧夫是訓用違**庶言號令也庶獄獄訟也庶慎

國之禁戒儲備也有司有職主者牧夫牧人也文王不敢下侵庶職惟庶獄

于有司牧夫訓勅用命及違命者而已漢孔氏曰勞于求才逸于任賢

**庶慎文王罔敢知于茲**上言罔敢兼則猶知之特不兼其事耳至

益專也上言庶言此不及者號令出于君有不容不知者故也呂氏曰不曰罔

知于茲而曰罔敢知于茲者徒言罔知則是莊老之無為也惟言罔敢知然後

見文王敬畏思不出位之意

稟塾之辨學者宜精察之

敢知不及庶言者事未施行則謂之言既施行獄與慎可包之矣○王氏曰君

道以擇人為職上必無為而用天下必有為而為天下用此君臣之分也○

愚謂文王用三宅得人則委任責成不復侵其職惟加重于有司之為牧夫者

訓勅其用命與否而已牧夫即宅牧之屬上文只及常事司牧而不及準人此

庶獄即準人之事也此篇論三宅有全言之者

有舉其二者有舉其一者參錯及之不拘也

**亦越武王率惟牧功**

**不敢替厥義德率惟謀從容德以並受此丕丕基**循

也救功安天下之功義德義德之人容德容德之人蓋義德者有撥亂反正之

才容德者有休休樂善之量皆成德之人也周公上文言武王率循文王之功

而不敢替其所用義德之人率循文王之謀而不敢違其容德之士意如號叔

闕天散宜生泰顛南宮括之徒所以輔成王業者文用之于前武任之于後故

周公于君稟言五臣克昭文王受有殷命武王惟茲四人

尚迪有祿正猶此敘文武用人而言並受此丕丕基也

王撫安天下之功不敢廢其義德又循惟文王寬容天下之德○呂氏曰文王

一怒而安天下之民安民即救功一怒義德也武王亦一怒安民所以率惟不



政替也肆不殄厥愠亦不殞厥問文王之容德也容德聖人本心故率惟謀從  
義德非聖人所專任故迫于不得已而不敢替焉○愚案蔡氏本夏氏說承上  
文用人而言乃不改父之臣之意真氏亦采之然深玩繹文意 嗚呼孺子  
曰不敢替厥曰率惟謀從孔呂之說為得本來語意之實耳

王矣繼自今我其立政立事準人牧夫我其克灼知

厥若不乃俾亂相我受民和我庶獄庶慎時則勿有

間之 我者指王而言若順也周公既述文武基業之大歎息而言曰孺子今  
既為王矣繼此以往王其于立政立事準人牧夫之任當能明知其所

順順者其心之安也孔子曰察其所安人焉度哉察其所順者知人之要也夫  
既明知其所順果正而不他然後推心而大委任之使展布四體以為治相助  
左右所受之民和調均齊獄慎之事而又戒其勿以小人間之使得終始其治  
此任人之要也民而謂之受者言民者乃受之于天受之于祖宗非成王之所  
自有

**纂疏** 呂氏曰申前告嗣天子王矣之意屢言深警之非前日委重視成  
也 比也物莫不有所順水順而下火順而上蓋有湮之而不下鬱之  
而不上者矣終非其所順也人豈無矯飾以勉為善者苟能灼知其所順則心  
之所安不得遁矣夏后宅人亦曰用丕訓德訓順也知厥若又勿使異意者間  
之知人不可不盡任人不可不專竭兩端告之也○陳氏大猷曰我其 君臣  
一體也○張氏曰王自今立政亦曰立事準人牧夫灼知三宅之心而已○愚  
案孔氏謂立政大臣立事小臣以事字為句非也惟張氏辨句讀甚合經旨証  
以上下文上提三政而下列三宅甚協兼之繼自今立政立事準人牧夫與我

周文王立政立事牧夫準人立政下列三宅則並有立事字國則罔有立政用  
儉人繼自今立政其勿以儉人立政下不列三宅則並無立事字尤為顯証

自一話一言我則末惟成德之彥以又我受民 末終惟  
思也自

一話一言之間我則終思成德之美士 **纂疏** 王氏曰一話說一事之始終也  
以治我所受之民而不敢斯須忘也 一言一句而已○愚謂相受民

牧之責也和庶獄準之責也和庶所當慎之事事之責也三宅備矣話言樞機  
之發也委任三宅欲勿以小人間之苟或一話言間微不終于專主君子則小  
人乘間入之矣此公戒王以 嗚呼予旦已受人之徽言成告孺

子王矣繼自今文子文孫其勿誤于庶獄庶慎惟正

是又之 前所言禹湯文武任人之事無非至美之言我聞之于人者已皆  
告孺子王矣文子文孫者成王武王之文子文王之文孫也成王

之時法度彰禮樂著守成尚文故曰文誤失也有所兼有所知不付之有司而  
以已誤之也正猶康誥所謂正人與宮正酒正之正指當職者為言不以已誤  
庶獄庶慎惟當職之人是治之下文言 **纂疏** 孔氏曰惟以正是之道治庶獄  
其勿誤庶獄惟有司之牧夫即此意 庶慎○呂氏曰惟以正道治之  
付之獄慎使以正法斷刑以正理揆事所謂正道也不知正道雖惴惴然  
欲勿誤能勿誤乎勿誤者敬之心惟正者治之體也或曰正正人也 自

古商人亦越我周文王立政立事牧夫準人則克宅



之克由繹之茲乃俾乂

自古及商人及我周文王于立政所以用三宅之道則克宅之者能得賢者以居其

職也克由繹之者能細繹用之而盡其才也既能宅其才

**纂疏**

陳氏曰繹如

以安其職又能繹其才以盡其用茲其所以能俾乂也歟  
端緒任之當矣又繹之詳其所行考其所就猶堯之詢事考言舜之明試考績也○呂氏曰由繹由其外而繹其中也由其言而繹其心由其才而繹其德由其發舒于一時而繹其持久于歲晏不一而足也克宅之則人與位相稱國克由繹之則表與裏相符其審如是然後俾之為治既俾之則一委之矣

則罔有立政用儉人不訓于德是罔顯在厥世繼自

今立政其勿以儉人其惟吉士用勸相我國家

自古為國無有

立政用儉利小人者小人而謂之儉者形容其沾沾便捷之狀也儉利小人不順于德是無能光顯以在厥世王當繼今以往立政勿用儉利小人其惟用有常吉士使勉力以輔我國家也呂氏曰君子陽類用則升其國

**纂疏**

陳氏

于明昌小人陰類用則降其國于晦昧陰陽升降亦各從其類也

曰儉人矯飾以為德然非其心之所順與不訓厥若正相反○呂氏曰儉人者吉士之反也

矣其勿誤于庶獄惟有司之牧夫

始言和我庶獄庶慎時則勿有間之繼言其勿誤于

庶獄庶慎惟正是乂之至是獨曰其勿誤于庶獄惟有司之牧夫蓋刑者天下之重事擊其重而獨舉之使成王尤知刑獄之可畏必專有司牧夫之任而不

好然如蔡氏所謂能其三宅之心於文理欠順否則克字下或脫一知字或厥字本知字之誤乃可耳

文王罔攸兼于庶

言庶獄庶慎惟有司之牧夫是訓用違

庶言號今也庶獄獄訟也庶慎國之

禁戒儲備也有司有職主者牧夫牧人也文王不敢下侵庶職惟於有司牧夫訓敕用命及違命者而已漢孔氏曰勞於求才逸於任賢

**纂註**

呂氏

曰庶言謂凡奏請訟庶獄謂凡刑辟訊鞠庶慎謂凡事繫利害而當謹戒者

庶獄庶慎文王罔敢知于

茲信上言罔攸兼則猶知之特不兼其事耳至此罔敢知則若未嘗知其事蓋

曰不言罔知于茲而曰罔敢知于茲者徒言罔知則是莊老之無為也惟言罔敢知然後見文王敬畏思不出位之意豪釐之辯學者宜精察之

**纂註**

呂氏曰罔敢知不及庶言者事未施行則謂之言既施行則獄與慎可包之矣○王氏曰君道以擇人為職上必無為而用天下必有為而為天下用此君臣之分也○新安陳氏曰上文雖及常事司牧人而不及準人庶獄即準人之事也此篇論三宅有全言之者有舉其二者有舉其一者參錯及之耳

越武王率惟救功不敢替厥義德率惟謀從容德以

並受此丕丕基

率循也救功安天下之功義德義德之人容德容德之人蓋義德者有撥亂反正之才容德者有休休樂善之

量皆成德之人也周公上文言武王率循文王之功而不敢替其所用義德之人率循文王之謀而不敢違其容德之士意如號叔閱天散宜生泰顛南宮括



之徒所以輔成王業者文用之於前武任之於後故周公於君奭言五臣克昭  
文王受有殷命武王惟茲四人尚迪有祿正猶此敘文武用人而言並受此不  
丕基

**纂註**

孔氏曰亦於武王循惟文王撫安天下之功不致廢其義德又循  
惟文王寬裕之德○呂氏曰文王一怒而安天下之民安民所謂救

功一怒所謂義德也武王亦一怒而安天下之民所以率惟不替者也肆不  
殄厥愾亦不隕厥問文王之容德也不泄邇不忘遠邇并包所以率惟謀從  
之者也容德聖人所尚故率惟謀從義德非聖人所專任則迫於不得已而  
敢替焉○蔡初王氏曰紂用暴德逸德之人正與此相反○新安陳氏曰蔡氏  
承上文之用三宅而言蓋不改父之臣之意此說出於夏氏真氏取之以其切  
於立政用人故也然深繹文意曰不敢替厥曰率惟謀從恐孔呂之說為得本  
來語意

鳴呼孺子王矣繼自今我其立政立事準人牧

夫我其克灼知厥若丕乃俾亂相我受民和我庶獄

庶慎時則勿有間之

我者指王而言若順也周公既述文武基業之  
大歎息而言曰孺子今既為王矣繼此以往王

其於立政立事準人牧夫之任當能明其所順順者其心之安也孔子曰察  
其所安人焉度哉察其所順者知人之要也夫既明其所順果正而不他然  
後推心而大委任之使展布四體以為治相助左右所受之民和調均齊獄慎  
之事而又戒其勿以小人間之使得始終始其治此任人之要也民而謂之受者  
言民者乃受之於天受之於  
祖宗非成王之所自有也

**纂註**

呂氏曰一篇之閒所謂王矣者蓋屢言而  
屢歎之深恐成王平日委重視成今猶不

夏先后知恤乎此故乃室大競禁不知恤也故罔後而湯陟焉自亦越成湯至  
奄旬萬姓言商先王知恤乎此故用協用見德紂不知恤也故帝罰之而周武  
受命焉自亦越文王武王以下言文武亦猶夏商先王之知恤也故並受丕基  
自孺子王矣以下拳拳以去儉人用常吉詰戎兵慎刑獄為王告欲王以先王  
之知恤為法以夏商後王之不知  
恤為鑒忠愛之至今猶可挹也

書卷第五

後學 成德 校訂



書卷第五

學

法

此篇論學法之要凡學必先立志立志必先定心定心必先寡欲寡欲必先克己克己必先致知致知必先格物格物必先致知致知必先格物格物必先致知致知必先格物



